

摘藻堂四庫全書薈要

史部

欽定四庫全書薈要

史部

通志卷一百四十八



詳校官員外郎臣楊世綸

欽定四庫全書薈要卷九千六十五

史部

通志卷一百四十八

宋 右迪功郎鄭樵漁仲撰

傳第六十一

後魏

盧元

子度世

度世子淵

淵子道將

道將子

昶

昶子元明

元從祖元

孫文偉

元族孫同

同

兄子景裕

景裕從弟勇

元族子誕

誕

父叔

高允

孫綽

允弟推

推弟燮

劉模

允

從祖弟

翼

崔鑒

子康

崔辯

子倫

逸子巨

崔挺

子孝芬

孝芬弟

孝偉

孝演

孝直

孝政

挺

李靈

李璨

弟振

挺族子纂

纂族子游

李順

子敷

敷弟式

李孝伯

父曾

兄祥

祥

瑒

瑒

李裔

族父

李義深

弟同

游雅

從祖弟

明根子肇

高閭

趙逸

胡方回

胡叟

張湛

段承根

父琿

宗欽

闕駟

劉昞

趙柔

索敞

陰世

宋絲

江式

盧元字子真范陽涿人也曾祖諡晉司空劉琨從事中

郎祖偃父邈並仕慕容氏偃為營丘太守邈為范陽太守皆以儒雅稱神麴四年太武辟召天下儒儁以元為首授中書博士遷侍郎本州大中正使馮弘令弘稱臣內附司徒崔浩元之外兄也每與元言輒歎曰對子真使我懷古之情更深浩大欲齊整人倫分明姓族元勸之曰創制立事各有其時樂為此者詎幾人也宜三思之浩當時雖無異言而終不納浩敗頗亦由此後賜爵固安子拜寧朔將軍兼散騎常侍使宋宋文帝與之言

嘉歎良久曰中郎卿曾祖也既還病卒贈平東將軍幽州刺史固安侯諡曰宣子度世字子遷幼而聰達有計數為中書學生應選東宮弱冠與從兄遐俱以學行為時流所重遐特為崔浩所敬位至尚書光祿大夫范陽子度世後以崔浩事棄官逃於高陽鄭羆家羆匿之使者囚羆長子將加捶楚羆戒其子曰君子殺身以成仁汝雖死勿言子奉父命遂被拷掠灼爇至死卒無所言度世後令弟娶羆妹以報其恩太武臨江宋文使其殿

上將軍黃延年朝貢帝問延年曰范陽盧度世坐與崔
浩親通逃命江表應已至彼延年對曰都下無聞當必
不至帝詔東宮赦度世宗族逃亡及籍沒者度世乃出
赴京拜中書侍郎襲爵興安初兼太常卿立保太后父
遼西獻王廟進爵為侯後除散騎侍郎使宋應對宋侍
中柳元景失衷還被禁劾經年乃釋除濟州刺史州接
邊境將士數相侵掠度世乃禁勒所統還其俘虜二境
以寧後坐事免尋除青州刺史未拜卒諡曰惠四子淵

敏昶尚之初元有五子唯度世嫡餘皆別生崔浩事難其庶兄弟恒欲危之度世常深忿恨及度世有子母誠約令絕妾孽不得使長以防後患至淵兄弟婢妾生子雖形貌相類皆不舉接為識者所非淵字伯源小名陽烏性溫雅寡欲有祖父風敦尚學業閨門和睦襲爵降為伯累加祕書監本州大中正時孝文帝將立馮后先問淵淵請加簡卜帝曰以先后之姪朕意已定淵曰雖奉勅如此然臣心實有未盡及朝臣集議執意如前馮

誕有盛寵深以為恨淵不以介懷及孝文議伐齊淵表
以為萬乘親戎轉運難繼詔雖不從而優答之尋以齊
武帝殂停師時涇州羌叛殘破城邑淵以步騎六千號
三萬徐行而進未經三旬賊衆逃散降者數萬口唯梟
首惡餘悉不問詔兼侍中初淵年十四嘗詣長安將還
餞送者五十餘人別於渭北有相者扶風人王達曰諸
君皆不如此盧郎雖位不副實然得聲名甚盛望踰公
輔後二十餘年當制命關右願不相忘此行也相者年

過八十詣軍門請見言叙平生未幾守儀曹尚書及齊
雍州刺史曹虎請降乃以淵為使持節安南將軍督前
鋒諸軍徑赴樊鄧辭以儒生不閑軍事帝不許淵曰臣
恐曹虎為周魴耳陛下宜審之虎果偽降淵乃進攻赭
陽師敗坐免官爵尋遭母憂服闋兼太尉長史後為徐
州刺史京兆王愉兼長史愉時年少事無巨細皆決於
淵淵以誠信御物甚得東南人和南徐州刺史沈陵密
謀叛淵屢以表聞朝廷不納陵果逃叛陵之餘黨淵皆

撫而赦之唯歸罪於陵由是衆心乃安景明初卒於祕
書監年四十八贈幽州刺史復本爵固安伯諡曰懿初
謚父志法鍾繇書傳業累世世有能名至邈以上兼善
草迹淵習家法代京宮殿多淵所題白馬公崔宏亦善
書世傳衛瓘體魏初工書者崔盧二門淵與僕射李冲
特相友善冲重淵門風而淵私冲才官故結為婚姻往
來親密至於淵荷孝文意遇頗亦由冲淵有八子道將
道亮道裕道虔道侶道約道和道舒道將字祖業應襲

父爵而讓第八弟道舒詔不許道將引清河王國常侍
韓子熙讓弟采魯陽男之例詔乃許之道將涉獵經史
風氣謬諤頗有文才為一家之冠諸父並敬憚之彭城
王勰任城王澄皆虛襟相待勰為中軍大將軍辟行參
軍累遷燕郡太守道將下車表樂毅霍原之墓為之立
祠優禮儒生勵勸學業敦課農桑墾田歲倍卒於司徒
司馬贈太常卿諡曰獻所為文筆數十篇子懷祖太學
博士員外散騎侍郎子莊少有美名位都水使者卒官

懷祖弟懷仁字子友涉學有辭性恬靜蕭然有閑雅致
歷太尉記室弘農郡守不之官卜居陳留界所著詩賦
銘頌二萬餘言撰中表實錄二十卷懷仁有行檢善與
人交與琅邪王衍隴西李壽之情好相得常語衍云昔
太丘道廣許邵知而不顧嵇生峭立鍾會遇而絕言吾
處季孟之間去其太甚衍以為然子彥卿有學尚仕隋
位御史撰後魏紀三十卷唐貞觀中位石門令東宮學
士道將弟道亮字仲業隱居不仕子思道列在隋史道

亮弟道裕字寧祖少以學尚知名風儀兼美尚獻文女
樂浪長公主拜駙馬都尉歷位中書侍郎太子中庶子
幽州大中正卒於涇州刺史諡曰文道裕弟道虔字慶
祖麤閑經史兼通算術尚孝文女濟南長公主拜駙馬
都尉公主驕恣辱穢遐邇無疾暴薨時云道虔所害宣
武祕其事不告窮之後靈太后追主薨事黜道虔令終
身不仕道虔外生李或尚孝莊姊豐亭公主因相藉託
永安中除輔國將軍通直常侍以議歷勲賜爵臨淄伯

天平中歷都官尚書本州大中正幽州刺史加衛大將軍卒官贈尚書右僕射司空公瀛州刺史諡曰文恭道虔好禮樂難齊尚書令王儉喪服集記七十餘條為尚書與同僚於草屋之下設雞黍之饌談者以為高昧且將上省必見其弟然後去奴於馬上彈琵琶道虔聞之杖一百公主二子昌寓昌仁昌寓不慧昌仁早卒道虔又娶司馬氏有子昌裕後司馬氏見出更聘元氏甚聰悟常升高座講老子道虔從弟元明隔紗帷以聽焉元

氏生二子昌期昌衡昌衡最知名列在隋史道虔弟道
侶字希祖沈雅有學尚位州主簿卒以弟道約子正達
為後道侶弟道和字叔雍兄弟之中人望最下位冀州
中軍府中兵參軍卒子景猷弘農太守景猷子士彥有
風槩隋開皇中為蜀王秀屬以秀所為不軌辭疾終於
家道和弟道約字季恭位司徒屬幽州大中正興和末
除衛大將軍兗州刺史在州頗得人和卒贈儀同三司
幽州刺史子正通少有令譽位開府諮議卒妻謝氏與

正道弟正思淫亂為御史所劾人士疾之正思弟正山
字公順早以文學見知為符璽郎侍詔文林館正思兄
弟以齊太后舅氏武平中並得優贈道約弟道舒字幼
安襲父爵位中書侍郎子熙裕襲熙裕清虛守道有古
人風為親表所敬淵弟敏字仲通小字洪崖少有大量
孝文器之納其女為嬪位儀曹郎早卒贈威遠將軍范
陽太守諡曰靖五子長義僖字遠慶早有學尚識度沈
雅年九歲喪父便有至性少為僕射李冲所歎美起家

祕書郎累遷冠軍將軍中散大夫以母憂去職幽州刺史王誦與之交款每與故舊李神儁等書曰盧冠軍在此時復惠存輒連數日得以諮詢政道其見重若此後除征虜將軍太中大夫散秩多年澹然自得李神儁勸其干謁當塗義儔曰既學先王之道貴行先王之志何得苟求富貴也孝昌中除散騎常侍時靈太后臨朝黃門侍郎李神軌勢傾朝野求結婚姻義儔慮其必敗拒而不許王誦謂義儔曰昔人不以一女易五男卿易之

邪義僖曰所以不從正為此耳從之恐禍大而速之乃
堅握義僖手曰我聞有命不敢以告人女遂適他族臨
婚之夕靈太后遣中常侍服景就家勅停內外惶怖義
僖夷然自若普泰中除都官尚書驃騎大將軍左光祿
大夫義僖寬和畏慎不妄交款性清儉不營財利少時
幽州頻遭水旱先有數萬石穀貸人義僖以年穀不熟
乃燔其券州閭懷其恩德雖居顯位每至困乏麥飯蔬
食怡然甘之卒贈大將軍儀同三司瀛州刺史諡曰孝

簡子遜之清靖寡欲位太尉記室參軍義僖四弟並遠
不逮兄也敏弟昶字叔達小字師顏學涉經史早有時
譽太和初為太子舍人兼員外散騎常侍使於齊孝文
詔昶曰卿使至彼勿存彼我密邇江揚不早當晚會是
朕物卿等欲言便言無相疑難又勅副使王清石曰卿
莫以南人語致疑盧昶若彼先有知識欲見但見須論
即論昶正寬柔君子無多文才或主客命卿作詩莫以
昶不作便罷也凡使人之體以和為貴勿迭相矜夸見

於色貌失將命之體卿等各率所見以相規誨及昶至
彼值齊明帝即位於是孝文南伐昶兄淵為別道將軍
而齊明以朝廷加兵遂酷遇之昶等本非骨鯁聞南人
云兄既作仇弟為使者乃大恐怖淚汗交橫齊明以腐
米臭魚莖豆供之而謁者張思寧辭氣蹇諤曾不屈撓
遂以壯烈死於館中昶還孝文責之曰銜命之禮有死
無辱雖流放海隅猶宜抱節致殞卿不能長纓羈首已
是可恨何乃俛首飲啄自同犬馬有生必死修短幾何

卿若殺身成名貽之竹素何如甘彼芻菽以辱君父乎
縱不能遠慙蘇武寧不近愧思寧昶遂見罷黜景明初
除中書侍郎遷給事黃門侍郎本州大中正散騎常侍
兼尚書時洛陽縣獲白鼠昶奏曰謹按瑞典外鎮刺史
二千石令長不祇上命刻暴百姓人民怨嗟則白鼠至
斯乃萬古千齡之鑒誠今郡闕黃霸之君縣無魯恭之
宰不思所以治民止思所以潤屋故士女呼嗟相望於
道伏願陛下垂叡喆之鑒察妖災之由詔曰讜言有聞

朕實嘉美轉侍中又兼吏部尚書尋即正仍侍中昶守
職而已無所激揚與侍中元暉更相朋附為宣武所寵
時論鄙之出除鎮東將軍徐州刺史經畧淮南昶既儒
生本少將畧又羊祉子燮為昶司馬專任戎事掩昶耳
目將士怨之朐山戍主傅文驥糧樵俱罄以城降于梁
昶見城降先走退諸軍相尋奔遁遇大雪寒軍人凍死
及落手足者三分而二自魏經畧江右唯有中山王英
敗於鍾離昶敗於朐山最為甚焉宣武遣黃門甄琛馳

驛鑠昶窮其敗狀詔以免官論自餘將統以下悉聽依
赦復任未幾拜太常卿仍除雍州刺史進號鎮西將軍
加散騎常侍卒官諡曰穆昶寬和矜恕善於綏懷其在
徐州戍兵有疾親自檢卹至番兵年滿不歸容充後役
終昶一政然後始還人庶稱之子元聿字仲訓無他才
能尚孝文女義陽公主拜駙馬都尉位太尉司馬光祿
大夫卒贈中書監子士晟儀同開府掾元聿第五弟元
明字幼章涉歷羣書兼有文義風采閑潤進退可觀永

安初長兼員郎尚書令臨淮王彧善之及開府引為兼
屬仍領部曲孝武帝登阼以郎任行禮封城陽縣子遷
中書侍郎永熙末居洛東緱山乃作幽居賦以見志於
時元明友人王由居潁川忽夢由攜酒就之言別賦詩
為贈及明憶其詩十字云自茲一去後市朝不復游元
明歎曰由性不狎俗旅寄人間乃有令夢詩復如此必
有他故經三日果聞由為亂兵所害尋其亡日乃是發
夢之夜天平中兼吏部郎中副李諧使梁南人稱之還

拜尚書右丞轉散騎常侍監起居積年在史館了不措
意又兼黃門郎本州大中正元明善自標置不妄交游
飲酒賦詩遇興忘返性好立理作史子雜論數十篇諸
文別有集錄少時嘗從鄉還洛途遇相州刺史中山王
熙熙博識之士見而歎曰盧郎有如此風神唯須誦離
騷飲美酒自為佳器遂留之數日贈帛及馬而別元明
凡三娶次妻鄭氏與元明兄子士啟淫污元明不能離
絕又好以世地自矜時論以此貶之元明弟元緝字幼

緒兌麤好酒曾於婦氏飲宴小有不平手刃其客位輔
國將軍司徒司馬贈驃騎大將軍吏部尚書幽州刺史
諡曰宣昶弟尚之字季儒小字羨夏亦以儒素見重位
司徒左長史前將軍濟州刺史光祿大夫長子文甫字
元祐涉歷文史有名譽於時位司空行參軍文甫弟文
翼字仲祐少甚輕躁晚頗改節以軍功賜爵范陽子位
大中大夫文翼弟文符字叔偉性通率位通直散騎侍
郎子潛仕齊有傳初度世之為濟州也魏初平升城無

鹽房崇吉母傅氏度世繼外祖母兄之子婦也兗州刺史申纂妻賈氏崇吉之姑女也皆亡破老病憔悴而度世推計中表致其供恤每覲見傅氏跪問起居隨時奉送衣被食物亦存賑賈氏供其服膳青州既陷諸崔墜落多所收贖及淵昶等竝循父風遠親疎屬凡為尊行長者莫不畢拜致敬閨門之禮為世所推謙退簡約不與世競父母亡後同居共財自祖至孫家內百口在洛時有饑年無以自贍然尊卑怡穆豐儉同之親從昆季

常旦省諸父出坐別室暮乃歸內朝府之外不妄交游
其相勗以禮如此又一門三主當世以為榮淵兄弟亡
及道將卒後家風衰替子孫多有非法悻薄混穢為時
論所鄙度世從祖弟神寶位中書博士孝文為弟高陽
王雍納其女為妃初元從祖兄溥慕容寶之末統攝鄉
部屯海濱殺其鄉姻諸祖十餘人稱征北大將軍幽州
刺史攻掠郡縣天興中討禽之溥玄孫洪字曾孫太和
中位中書博士樂陵陽平二郡太守幽州中正洪三子

長子崇少立美名有識者許之以遠大卒於驃騎府法
曹參軍宗子柔周世通顯自有傳崇弟仲義字小黑知
名於世位員外散騎侍郎幽州刺史崇兄弟官雖不甚
達婚姻常與元家齊等洪弟光宗位尚書郎光宗子觀
觀弟仲宣皆有雋才並列在文苑傳中仲宣弟叔彪仕
齊歷官至太子詹事齊史有傳洪從弟附伯附伯弟侍
伯並有學識附伯位滄州平東府長史侍伯南岐州刺
史侍伯從弟文偉字休族父敞位議郎後以文偉勲贈

幽州刺史文偉少孤有志尚頗涉經史州辟主簿年三十八始舉秀才除本州平北府長流參軍說刺史裴雋案舊迹修督亢陂溉田萬餘頃人賴其利雋修立之功多以委之文偉既善於營理兼展私力家素貧儉因此致富及北方將亂文偉積稻穀於范陽城時經荒儉多所賑贍彌為鄉里所歸及韓樓據薊城文偉鳩率鄉閭守范陽樓平以功封大夏縣男除范陽太守孝莊崩文偉與幽州刺史劉靈助同謀起義靈助克瀛州留文偉

行州事自率兵赴定州為爾朱榮將侯深所敗文偉走還本郡仍與高乾兄弟相影響屬齊神武至信都文偉遣子懷道奉啟陳謝中興初除安州刺史不之官尋轉幽州刺史安州刺史盧胄亦從靈助舉兵靈助敗因據幽州降爾朱兆仍以為刺史據城不下文偉不得入後除青州刺史文偉輕財愛客善於撫接好為小惠是以所在頗得人情經紀生資常若不足致財積聚承候寵要餉遺不絕卒贈司徒公尚書右僕射諡曰孝威子恭

道性溫良頗有文學位范陽太守有德惠先文偉卒贈
度支尚書諡曰定子詢祖齊太子舍人司徒記室列在
齊史恭道弟懷道性輕率好酒頗有慕尚既密預義舉
神武親待之卒於烏蘇鎮城都督懷道弟宗道性麤率
頗事豪俠位南營州刺史嘗於晉陽置酒賓游滿座中
書舍人馬士達目其彈箏篴女妓云手甚纖素宗道即
以遺之士達固辭宗道便命其家人將解其腕士達不
得已而受之將赴營州於督亢城大集鄉人殺牛聚會

有一舊門人醉言疎失宗道令沈之於水後坐酷濫除
名元族子通字顯光本州別駕子同字叔倫身長八尺
容貌魁偉善於處世太和中起家北海王祥國常侍熙
平初累遷尚書左丞時相州刺史奚康生徵百姓歲調
皆長七八十尺以邀憂公之譽部內患之同於歲祿得
官給長絹乃舉按康生度外徵調書奏詔科康生罪兼
褻同在公之績明帝世朝政稍稀人多竊冒軍功同因
閱吏部勲書深加檢覈得竊階者三百餘人乃表言吏

部勲簿改換之弊又奏在軍文案尤多虛詐乃為立格以杜姦罔詔並依行元乂之廢靈太后也相州刺史中山王熙起兵於鄴兵敗被執乂以同為持節兼黃門侍郎慰勞使乃就州刑熙還授正黃門同善事在位為乂所親戮熙之日深窮黨與以希乂旨論者非之同兄琇少多大言常云公侯可致至此始為都水使者同啟求回身二階以加琇琇遂除安州刺史亦為論者所稱營州城人就德興謀反除同度支尚書持節使營州慰勞

聽以便宜從事同乃遣賊家口三十人并免家奴為良
齋書喻之德興乃降安輯其人而還德興復反詔同為
幽州刺史兼尚書行臺慰勞之同慮德興難信勒衆而
往為德興所擊大敗而還靈太后反政以同為義黨除
名孝莊踐阼詔復本秩除都官尚書復兼七兵以前慰
勞德興功封章武縣伯正除七兵轉殿中普泰初除侍
中進號驃騎將軍左光祿大夫同時久病牽彊啟乞儀
同初同之為黃門也與節閔帝俱在門下同異其為人

素相款託帝以恩舊許之除儀同三司永熙初薨贈尚書右僕射四子長子斐嗣斐性殘忍齊天保中典京畿詔獄以酷稱列在酷吏傳中斐弟筠青州從事同允靜好學有風度飲酒至數斗不亂終於太常丞大統初贈太僕卿平州刺史靜子景裕字仲孺小字白頭少聰敏專精為學居拒馬河將一老婢作食妻子不自隨後又避地太寧山不營世事居無二業唯在注解其叔父同職居顯要而景裕止於園舍情均郊野謙恭守道貞素

自得由是世號居士節閤初除國子博士參議正聲甚
見親遇待以不臣之禮永熙初以例解天平中還鄉里
與邢子才魏季景魏收邢昕等同徵赴鄴景裕寓託僧
寺聽講不已未幾歸本郡河間邢摩納與景裕從兄仲
禮據鄉作逆偪其同反以應西魏齊神武命都督賀拔
仁討平之聞景裕經明行著驛馬特徵既而舍之使教
諸子在館中十日一歸家隨以鼎食景裕風儀言行雅
見嗟賞先是景裕注周易尚書孝經論語禮記老子其

毛詩春秋左氏未訖齊文襄入相於第開講招延時儁
令景裕解所注易景裕義理精微吐發閑雅時有問難
或相詆訶大聲厲色言至不遜而景裕神彩儼然風調
如一從容往復無際可尋由是士君子嗟美之初元顥
入洛以為中書郎普泰中復除國子博士進退其間未
曾有得失之色性清靜淡於榮利弊衣麤食恬然自安
終日端嚴如對賓客興和中補齊王開府屬卒於晉陽
神武悼惜之景裕雖不聚徒教授所注易大行於世又

好釋氏通其大義天竺胡沙門道惺每譯諸經論輒託景裕為之叙景裕之敗也繫晉陽獄至心誦經枷鎖自脫是時又有人負罪當死夢沙門教講經覺時如所夢謂誦千遍臨刑刀折主者以聞赦之此經遂行號曰高王觀世音景裕弟辯仕周歷位大將軍自有傳景裕從弟勇字季禮父壁下邳太守勇初與景裕俱在學其叔同曰白頭必以文通季禮必以武達興吾門者二子也幽州反者僕骨邢以勇為本郡范陽王時年十八後葛

榮又以勇為燕王齊神武起兵盧文偉召之不應爾朱

氏滅乃赴晉陽神武署丞相主簿屬山西霜儉運山東

租輸皆令實載違者罪之令勇典其事南鄉郡公主虛

僦千餘車勇劾之公主訴於神武而勇守法不虧神武

謂郭秀曰盧勇懔懔有不可犯之色真公直人也方當

委之大事豈止納租而已後行洛州事元象初官軍圍

廣州未拔行臺侯景聞西魏救兵將至集諸將議之勇

請進觀形勢於是率百騎各攬一馬至大駝山知西魏

將李景和將至勇乃多置旛旗於樹頭分騎為數十隊
鳴角直前禽西魏儀同程華斬儀同王征蠻而還再遷
揚州刺史鎮宜陽叛人韓木蘭陳忻等常為邊患勇大
破之啟求入朝神武賜勇書曰吾委卿揚州安枕高卧
無西南之憂矣表啟宜停當使漢兒之中無在卿前者
卒年三十二勇有馬五百匹私造甲仗遺啟盡獻之贈
司空冀州刺史諡曰武貞元族子誕本名恭祖曾祖晏
博學善隸書有名於世仕慕容氏位給事黃門侍郎營

丘成周二郡守祖壽太子洗馬慕容氏滅入魏為魯郡
守父叔仁年十八州辟主簿舉秀才除員外郎以親老
乃辭歸就養父母既歿哀毀六年躬營墳壠遂有終焉
之志景明中被徵入洛授虎賁中郎將非其好也尋除
鎮遠將軍通直散騎常侍並稱疾不朝乃出為幽州司
馬又辭歸鄉里當時咸稱其高尚焉誕於度世為族弟
幼而通亮博學有詞彩郡辟功曹州舉秀才不行起家
侍御史累遷輔國大將軍太中大夫幽州別駕北豫州

都督府長史時刺史高仲密以州歸西魏西魏遣大將軍李遠率軍赴援誕與文武二千餘人奉候大軍以功授鎮東將軍金紫光祿大夫封固安縣伯尋加散騎侍郎拜給事黃門侍郎文帝詔曰經師易求人師難得朕諸兒稍長欲令卿為師於是親幸晉王第勅晉王以下皆拜之於帝前因賜名曰誕加征東將軍散騎常侍周文又以誕儒宗學府為當世所推乃啟拜國子祭酒進車騎大將軍儀同三司恭帝二年除祕書監後以疾卒

高允字伯恭渤海脩人漢太傅裒之後也曾祖慶慕容
垂司空祖泰吏部尚書父韜少以英朗知名同郡封懿
雅相推敬亦仕慕容垂為太尉從事中郎道武平中山
以韜為丞相參軍早卒允少孤夙成有奇度清河崔宏
見而異之歎曰高子黃中內潤文明外照必為一代偉
器但吾恐不見耳年十餘歲奉祖父泰喪還本郡推財
與二弟而為沙門名法淨未久而罷性好文學擔笈負
書千里就業博通經史天文術數尤好春秋公羊曾作

塞上公詩有混欣戚遺得喪之致神麤三年太武舅陽平王杜超行征南大將軍鎮鄴以允為從事中郎年四十餘矣超以方春而諸州囚不決表允與中郎呂熙等分詣諸州共評獄事熙等皆以貪穢得罪唯允以清平獲賞府解還家教授受業千餘人四年與盧元等俱被徵拜中書博士遷侍郎與太原張偉並以本官領衛大將軍樂安王範從事中郎範太武寵弟西鎮長安允甚有隆益秦人稱之尋被徵還驃騎將軍樂平王丕西討

上邽復以本官參丕軍事涼州平以參謀之勲賜爵汶
陽子後詔允與司徒崔浩述成國記與本官領著作郎
時浩集諸術士考校漢元以來日月薄食五星行度并
譏前史之失別為魏歷以示允允曰天文歷數不可空
論夫善言遠者必先驗於近且漢元年冬十月五星聚
於東井此乃歷術之淺事今譏漢史而不覺此謬恐後
之譏今還如今之譏古浩曰所謬云何允曰按星傳金
水二星常附日而行冬十月日旦在尾箕昏沒於申南

而東井方出於寅北二星何因背日而行是史官欲神其事不復推之於理浩曰欲為變者何所不可君獨不疑三星之聚而怪二星之來允曰此不可以空言爭宜更審之時坐者咸怪唯少傅游雅曰高君長於歷數當不虛言也後歲餘浩謂允曰先所論者本不經心及更考究果如君語以前三月聚於東井非十月也又謂雅曰高允之術陽源之射也衆乃歎服允雖明於歷數初不推步有所論說唯游雅數以災異問允允曰昔人有

言知之甚難既知復恐漏泄不如不知也天下妙理至

多何遽問此雅乃止尋以本官為秦王翰傳後勅以經
授景穆甚見禮待又詔允與侍郎公孫質李靈胡方回
更定律令太武引允與論刑政言甚稱旨因問允曰萬
機之務何者為先是時多禁封良田又京師游食者衆
允因言曰臣少也賤所知唯田請言農事古人云方一
里則為田三頃七十畝方百里則為田三萬七千頃若
勸之則畝益三升不勸則畝損三升方百里損益之率

為粟二百二十二萬斛況以天下之廣乎若公私有儲
雖遇饑年復何憂乎帝善之遂除田禁悉以授民初崔
浩薦冀定相幽并五州士數十人各起家為郡守景穆
謂浩曰先召之人亦州郡選也在職已久勤勞未答今
可先補前召外任郡縣以新召者代為郎吏又守令宰
人宜使更事者浩固爭而遣之允聞之謂東宮博士管
恬曰崔其不免乎苟逞其非而校勝於上何以能濟遼
東宮翟黑子有寵於太武奉使并州受布千疋事覺黑

子請計於允謂主上問我首乎諱乎允曰公帷幄寵臣
答詔宜實又自告忠誠罪必無慮中書侍郎崔鑒公孫
質等咸言首實罪不測宜諱之黑子以鑒等為親已怒
允曰如君言誘我入死故不以實對為帝所疎終獲罪
戮是時著作令史閔湛郝標性巧佞為崔浩信待見浩
所注詩書論語及易遂上疏言馬鄭王賈雖注述六經
並多疏謬不如浩之精微乞收境內諸書藏之祕府班
浩所注令天下習業并求勅浩注禮傳令後生得覩正

義浩亦表薦湛有著述之才既而湛等又勸浩刊所撰國史于石以彰直筆允聞之謂著作郎宗欽曰閔湛所營分寸之間恐為崔門萬世之禍吾徒無類矣未幾而難作初浩之被收也允直中書省景穆使東宮侍郎吳延召允仍留宿宮內翌日命驂乘至宮門謂曰入當見至尊吾自尊卿脫至尊有問但依吾所對允請曰為何事景穆曰入自知之既入見帝景穆曰中書侍郎高允小心密慎臣所委悉雖與浩同事然允微賤制由於浩

請赦其命帝召允謂曰國書皆崔浩作不允對曰太祖
記前著作郎鄧淵所撰先帝記及今記臣與浩同作然
浩總裁而已至於注疏臣多於浩帝大怒曰此甚於浩
安有生路景穆曰天威嚴重允是小臣迷亂失次耳臣
向備問皆云浩作帝問如東宮不允曰臣罪應滅族不
敢虛妄殿下以臣侍講日久哀臣乞命耳實不問臣臣
不敢迷亂帝謂景穆曰直哉此亦人情所難而能臨死
不移且對君以實貞臣也寧失一有罪宜宥之允竟得

免於是召浩前使人詰浩浩惶惑不能對允事事申明皆有條理時帝怒甚勅允為詔自浩已下僮吏已上一百二十八人皆夷五族允持疑不為頻詔催切允乞便一見然後為詔詔引前允曰浩之所坐若更有餘豐非臣敢知直以犯觸罪不至死帝怒命介士執允景穆拜請帝曰無此人忿朕當有數千口死矣浩竟族滅餘皆身死宗欽臨刑歎曰高允其殆聖乎景穆後讓允曰人當知機不知機學復何益當爾之時吾導卿端緒何故

不從人言令帝怒如此每一念之使人心悸允曰臣東
野凡生本無官意屬休延之會應旌弓之舉釋褐鳳池
仍參麟閣夫史籍者帝王之實錄將來之明戒今之所
以觀往後之所以知今是以言行舉動莫不備載故人
君慎焉然浩以蓬艾之才荷棟梁之重在朝無謬謬之
節退私無逶迤之稱私欲沒其公廉愛憎蔽其直理此
浩之責也至於書朝廷起居之跡言國家得失之事此
亦為史之大體未為多違然臣實與浩同其事死生榮

辱義無獨殊誠荷殿下大造之慈違心苟免非臣之意
景穆動容稱歎允後與人言我不奉東宮導旨者恐負
翟黑子也景穆季年頗親近左右營立田園以收其利
允諫曰殿下國之儲貳四海屬心言行舉動萬方所則
而營立私田畜養雞犬乃至販酤市廛與人爭利議聲
流布不可追掩夫天下者殿下之天下富有四海何求
而不獲何欲而弗從而與販夫販婦競此尺寸願殿下
少察過言斥出佞邪所在田園分給貧下如此則休聲

日至諉議可除景穆不納景穆之崩也允久不進見後
進見升階歔歔悲不能止太武為之流涕乃命允出左
右莫知其故相謂曰允無何悲泣令至尊哀傷也帝聞
之召而謂曰汝不知高允之悲乎崔浩誅時允亦應死
東宮苦請以是得免今無東宮允見朕因悲耳允表曰
往年被勅令臣集天文災異使事類相從約而可觀臣
謹依洪範傳天文志撮其事要畧其文辭凡為八篇帝
覽而善之曰高允之明災異亦豈減崔浩乎及文成即

位允頗有謀焉司徒陸麗等皆受重賞允既不蒙褒異
又終身不言其忠而不伐皆此類也給事中郭善明性
多機巧欲逞其能勸文成大起宮室允諫曰臣聞太祖
道武皇帝既定天下始建都邑其所營立必因農隙令
建國已久宮室已備永安前殿足以朝會萬國西堂溫
室足以安御聖躬紫樓臨望可以周視遠近若廣修壯
麗為異觀者宜漸致之不可倉卒計斫材軍士及諸雜
役須二萬丁夫充作老小供餉合四萬人半年可訖古

人有言一夫不耕或受其饑一婦不織或受其寒况數

萬之衆其所損費亦已多矣帝納之允以文成纂承平

之業而風俗仍舊婚娶喪葬不依古式乃諫曰前朝之

世屢發明詔禁諸婚娶不得作樂及葬送之日歌謠鼓

舞殺牲燒座一切禁絕雖條旨久班而不革變將由居

上者未能悛改為下者習以成俗教化陵遲一至於此

詩云爾之教矣民胥傲矣人君舉動不可不慎禮云嫁

女之家三日不息火娶妻之家三日不舉樂今諸王納

室皆樂部給伎以為嬉戲而獨禁細人不得作樂此一異也古之婚者皆采德義之門妙簡貞閑之女先之以媒聘繼之以禮物集僚友以重其別親御輪以崇其敬令諸王十五便賜妻別居然所配者或長少差舛或罪入掖庭而以作合宗王妃嬪藩懿失禮之甚無復此過今皇子娶妻多出宮掖令天下之人必依禮限此二異也凡萬物之生靡不有死然葬者藏也死者不可再見故深藏之昔堯葬穀林農不易畝舜葬蒼梧市不改肆

秦始皇作為地市下錮三泉死不旋踵尸焚墓掘由此
推之堯舜之儉始皇之奢是非可見今國家營葬費損
巨億一旦焚之以為灰燼上為之而不輟而禁下人之
必止此三異也古者祭必立尸序其昭穆使亡者有馮
致食饗之禮今之魂人直求貌類者事之如父母宴好
如夫妻損敗風化黷亂情禮莫此之甚上未禁之下不
改絕此四異也夫大饗者所以定禮儀訓萬國故聖王
重之至乃爵盈而不飲肴乾而不食樂非雅聲則不奏

物非正色則不列今之大會內外相混酒醉誼諛罔有
儀式又俳優鄙褻污辱視聽朝廷積習以為美而責風
俗之清純此五異也今陛下當百王之末踵亂晉之弊
而不矯然釐革以厲頽俗臣恐天下蒼生永不聞見禮
教矣允言如此非一帝從容聽之或有觸忤帝所不忍
聞者命左右扶出事有不便允輒求見帝知允意逆屏
左右以待之禮敬甚重晨入暮出或積日居中朝臣莫
知所論或有上事陳得失者帝省而謂羣臣曰君父一

也父有是非子何為不作書於人中陳之使人知惡而
於家內隱處諫也豈不以父親恐惡彰於外也今國家
善惡不能面陳而上表顯諫此豈不彰君之短明已之
美至如高允者真忠臣矣朕有是非常正言面論至朕
所以不忍聞者皆侃侃論說無所避就朕聞其過而天
下不知其諫豈不忠乎汝等在左右不曾聞一正言但
伺朕喜時求官乞職其以弓刀侍朕左右者徒立勞耳
皆至公王此人執筆匡我國家不過著作郎汝等不亦

愧乎於是拜允中書令著作如故司徒陸麗曰高允雖
蒙寵待而家貧布衣妻子不立帝怒曰何不先言今見
朕用之方言其貧是日幸允第唯草屋數間布被縕袍
厨中鹽菜而已帝嘆息曰古人之清貧豈有此乎即賜
帛五百疋粟千斛拜長子忱為長樂太守允頻表固讓
帝不許初與允同徵游雅等多至通官封侯及允部下
之吏百數十人亦至刺史二千石而允為郎二十七年
不徙官時百官無祿允常使諸子樵採自給初尚書竇

瑾坐事誅瑾子遵亡在山澤遵母焦沒入縣官後焦以
老得免親故莫有卹者允愍焦年老保護在家積六年
遵始蒙赦始得歸養其篤行如此轉太常卿本官如故
允上代都賦因以規諷亦二京之流也時中書博士索
敞與侍郎傅默梁祚論名字貴賤著議紛紜允遂著名
字論以釋其惑甚有典證復以本官領祕書監解太常
卿進爵梁城侯初允與游雅及太原張偉同業相友雅
嘗論允曰夫喜怒者有生所不能無也而前史載卓公

寬中文饒洪量褊心者或弗之信余與高子游處四十餘年未見是非喜愠之色不亦信哉高子內文明而外柔弱其言呐呐不能出口余常呼為文子崔公謂余云高生豐才博學一代佳士所乏者矯矯風節耳余亦然之司徒之譴起於纖微及於詔責崔公聲嘶股戰不能一言宗欽以下伏地流汗都無人色高子敷陳事理申釋是非辭義清辯音韻高亮明主為之動容聽者無不稱善仁及寮友保茲元吉向之所謂矯矯者更在斯乎

宗愛之任勢也威振四海嘗召百司於都坐王公以下望庭畢拜高子獨升階長揖由此觀之汲長孺可卧見衛青何抗禮之有向之所謂風節者得不謂此乎知人故不易人亦不易知吾既失之於心內崔亦漏之於形外鍾期止聽於伯牙夷吾見明於鮑叔良有以也其為人物所推如此文成重允每不名之恒稱為令公令公之號播於四遠文成崩獻文居諒闇乙弗渾專擅朝命謀危社稷文明太后誅之引允禁中參決大政又詔允

曰朕稽之舊典欲置學官於郡國卿宗儒元老宜與中
祕二省參議以聞允上表請制大郡立博士二人助教
四人學生八十人中郡立博士一人助教二人學生六
十人下郡立博士一人助教一人學生四十人其博士
取博聞經典履行忠清堪為人師者年限四十以上助
教亦與博士同年限四十以上若道業夙成才任教授
不拘年齒學生取郡中清望人行修謹堪束修名教者
先盡高門次及中等帝從之郡國立學自此始也後允

以老疾頻上表乞骸骨詔不許於是乃著告老詩又以
昔歲同徵零落將盡感逝懷人作徵士頌蓋止於應命
其有命而不至則闕焉其著頌者中書侍郎固安侯范
陽盧元子真郡功曹史博陵崔綽茂祖河內太守下樂
侯廣寧燕崇元畧上黨太守高邑侯廣寧常涉公山征
南大將軍從事中郎渤海高毗子翼征南大將軍從事
中郎渤海李金道賜河西太守饒陽子博陵許堪祖根
中書郎新豐侯京兆杜銓士衡征西大將軍從事中郎

韋閭友規京兆太守趙郡李詵令孫太常博士鉅鹿公
趙郡李靈武符中書郎中即丘子趙郡李遐仲熙營州
刺史建安公太原張偉仲業輔國大將軍從事中郎范
陽祖邁征東大將軍從事中郎范陽祖侃士倫東郡太
守蒲陰子中山劉策濮陽太守真定子常山許琛行司
隸校尉中都侯西河宋宣道茂中書郎燕郡劉遐彥鑒
中書郎武恒子河間邢穎宗敬滄水太守浮陽侯渤海
高濟叔仁太平太守原平子鴈門李熙士元祕書監梁

郡公廣平游雅伯度廷尉正安平子博陵崔建興祖廣
平太守列人侯西河宋愔州主簿長樂潘符郡功曹長
樂杜熙征東大將軍從事中郎中山張綱中書郎上谷
張誕叔術祕書郎鴈門王道雅祕書郎鴈門閔弼衛大
將軍從事中郎中山郎苗大司馬從事中郎上谷侯辯
陳郡太守高邑子趙郡呂季才合三十四人其詞曰紫
氣干天羣雄亂夏王龔祖征戎車屢駕埽盪游氛克殪
祇霸四海從風八垠漸化政教無外既寧且壹偃武橐

兵唯文是恤帝乃虛求搜賢採逸巖隱投竿異人並出
疊疊盧生量遠思純鑽道據德游藝依仁旌弓既招釋
褐投巾攝齊升堂嘉謀日陳自東徂南躍馬馳輪僭馮
影附劉以和親茂祖甄單夙離不造克已勉躬聿隆家
道敦心六經游思文藻終辭寵命以之自保燕常篤信
百行靡遺仕不苟進任理栖遲居沖守約好讓善推思
賢樂古如渴如饑子翼致遠道賜悟深相期以義和若
瑟琴並參幕府俱發德音優游卒歲聊以寄心祖根運

會克光厥猷仰緣朝恩俯因德友功雖後建爵寔先受
班同舊臣位並羣后士衡孤立內省靡疚言不崇華交
不遺舊以產則貧論道則富所謂伊人實邦之秀卓矣
友規稟茲淑量存彼大方擯此細讓神與理冥形隨流
浪雖屈王侯莫廢其尚趙寔名區世多奇士山嶽所鍾
挺生三李矯矯清風抑容止初九而潛望雲而起詵
尹西都靈惟作傳載訓皇宮載理雲霧熙雖中天迹階
郎署餘塵可挹終亦顯著仲業深長雅性清到憲章古

式綢繆典誥時逢多艱當一其操納衆以仁訓下以孝
化洽龍川人歸其教邁則英賢侃亦稱選聞達邦家名
行素顯志在兼濟豈伊獨善繩匠弗顧功不獲展劉許
履忠竭力致躬出則騁說入獻其功輜軒一舉橈燕下
崇名彰魏世享業亦隆道茂夙成弱冠播名與朋以信
行物以誠怡怡昆弟穆穆家庭發響九臯翰飛紫冥頻
煩省闥亦司于京刑以之中政以之平猗歟彥鑒思參
文雅率性任真器成非假靡矜于高莫恥于下乃謝朱

門歸迹林野宗敬延譽號為四雋華藻雲飛金聲夙振
中遇沈疴賦詩以訖忠顯于辭理出于韻高滄朗達默
識該通領新悟異發自心胷質侔和璧文照雕龍耀姿
天邑衣錦舊邦士元先覺介焉不惑振袂來庭始賓王
國蹈方履正好是繩墨淑人君子其儀不忒孔稱游夏
漢美卿雲越哉伯度出類踰羣司言祕閣作牧河汾移
風易俗理亂解紛融彼滯義渙此潛文儒道以析九流
以分崔宋二賢誕性英偉擢穎閭閻聞名衆魏謩謩儀

形邈邈風氣達而不矜素而能貴潘符標尚杜熙好和
清不潔流渾不同波絕怖龍津止分常科幽而逾顯損
而逾多張綱柔謙叔術正直道雅洽聞弼為兼識拔萃
衡門俱漸鴻翼發憤忘餐豈要斗食率禮從仁罔愆于
式失不繫心得不形色郎苗始舉用均已試智足周身
言足為誌性協於時情敏於事與今而同與古而異物
以利移人以酒昏侯生潔已唯義是敦日縱醇醪逾敬
逾溫其在私室如涉公門季才之性柔而執競屆彼南

秦申威致命誘之以權矯之以正帝道用光邊王內慶
羣賢遭世顯名有代志竭其忠才盡其槩體襲朱裳腰
紉雙佩榮曜當時風高千載君臣相遇理實難階昔因
朝命與之克諧披衿散想解帶舒懷此所猶昨存亡奄
乖靜言思之衷心九摧揮毫頌德潛爾增哀皇興中詔
允兼太常至兗州祭孔子廟謂允曰此簡德而行勿有
辭也後允從獻文北伐大捷而還至武川鎮上北伐頌
帝時有不豫以孝文沖幼欲立京兆王子推集諸大臣

以次召問允進跪上前涕泣曰臣不敢多言以勞宸德
願陛下上思宗廟付託之重追念周公抱成王之事帝
於是傳位於孝文賜允帛千足以標忠亮又遷中書監
加散騎常侍雖久典史事然不能專勤屬述時與校書
郎劉模有所緝綴大較依續崔浩故事準春秋之體而
時有刊正自文成迄於獻文軍國書檄多允作也未乃
薦高閭以自代以定議之勲進爵咸陽公尋授懷州刺
史允秋月巡境問人疾苦至邵縣見邵公廟廢毀不立

乃歎曰邵公之德闕而不祀為善何望乃表修葺之允
時年將九十矣勸人學業風化頗行然儒者優游不以
斷決為事後正光中中書舍人河內常景追思允率郡
中故老為允立嗣於野王之南樹碑紀德焉太和二年
又以老乞還鄉章十餘上卒不聽許遂以疾告歸其年
詔以安車徵允勅州郡發遣及至都復拜鎮軍大將軍
領中祕書事固辭不許扶引就內改定皇誥又被勅論
集往世酒之敗德以為酒訓孝文覽而悅之常置左右

詔允乘車上殿朝賀不拜明年又詔允議定律令雖年漸期頤而志識無損猶心存舊職披考史書又詔曰允年涉危境而家貧養薄可令樂部絲竹十人五日一詣允以娛其志特賜允蜀牛一頭四望蜀車一乘素几杖各一蜀刀一口又賜珍味每春秋致之尋詔朝晡給御膳朔望致牛酒衣服綿絹每月給送允皆分之親故是時貴臣之門皆羅列顯官而允子弟皆無官爵其廉退若此遷尚書散騎常侍時延入備几杖詢以政事十年加

光祿大夫金章紫綬朝之大議皆諮訪焉其年四月有
事西郊詔御馬車迎允就郊所板殿觀矚馬忽驚奔車
覆傷眉三處孝文文明太后遣醫藥護療存問相望司
駕將處重坐允啟陳無恙乞免其罪先是命黃門蘇興
壽扶侍允曾雪中遇犬驚倒扶者大懼允慰勉之不令
聞徹興壽稱共允接事三年不曾見其忿色恂恂善誘
誨人不倦晝夜手常執書吟詠尋覽篤親念故虛已存
納雖處貴重志同貧素性好音樂每至伶人絃歌鼓舞

常擊節稱善又雅信佛道時設齋講好生惡殺魏初法
嚴朝士多見杖罰允歷事五帝出入三省五十餘年卒
無譴咎初太平真君中以獄訟留滯始令中書以經義
斷諸疑事允據律評刑三十餘載內外稱平允以獄者
人命所繫常歎曰臯陶至德也其後英蓼先亡劉項之
際英布黥而王經世雖久猶有刑餘之釁况凡人能無
咎乎性簡至不妄交游獻文之平青齊徙其族望於代
時諸士人流移遠至率皆饑寒徙人之中多允姻媾皆

徒步造門允散財竭產以相賑贍慰問周至無不感其
仁厚又隨其才能表奏申用時議者皆以新附致異允
謂取才任能無宜抑屈先是允被召在方山作頌志氣
猶不多損談說舊事了無所遺十一年正月卒年九十
八初允每謂人曰吾在中書時有陰德濟救民命若陽
報不差吾壽應享百年矣先卒旬外微有不適猶不寢
卧呼醫請藥出入行止吟咏如常孝文文明太后聞而
遣醫李修往脈視之告以無恙修入密陳允榮衛有異

懼其不久於是遣使備賜御饍珍羞自酒米至於鹽醢
百有餘品皆盡時味及牀帳衣服茵被几杖羅列於庭
王官往還慰問相屬允喜形於色語人曰天恩以我篤
老大有所賚得以贍客矣表謝而已不有他慮如是數
日夜中卒家人莫覺詔給絹千足布二千足綿五百斤
錦五十足雜綵百足穀千斛以周喪用魏初以來存亡
蒙賚者莫及焉朝廷榮之將葬贈侍中司空冀州刺史
將軍公如故諡曰文賜命服一襲允所製詩賦詠頌箴

論表讚誅左氏釋公羊釋毛詩拾遺雜解議何鄭膏肓
事凡百餘篇別有集行於世允尤明算法又為算術三
卷子忱襲忱字士和位長安太守為政寬惠百姓安之
後例降爵為侯卒子貴賓襲忱弟懷字士仁恬淡退靜
位太尉東陽王丕諮議參軍子綽字僧裕少孤恭敏自
立身長八尺腰帶十圍沈雅有度量博涉經史稍遷洛
陽令為政彊直不避豪右京邑憚之延昌初遷尚書右
丞後為御史中尉元匡奏高聰及綽朋附高肇詔並原

罪歷豫并二州刺史卒諡文簡允弟推字仲讓早有名
譽大延中以前後南使不稱妙簡行人游雅薦推應選
詔兼散騎常侍使宋南人稱其才辯卒於建業贈臨邑
子諡曰恭推弟燮字季和亦有文武才太武每詔徵辭
疾不應恒笑允屈折久宦栖泊京邑常從容於家州辟
主簿卒孫市賓永熙中開府從事中郎始神廡中允與
從叔濟族兄毗及同郡李金俱被徵濟位滄水太守淳
陽子卒贈冀州刺史諡曰宣子矯襲矯弟遵有能名莅

官嚴酷列在酷吏傳中毗字子翼鄉邑稱為長者位征南從事中郎初允所引劉模者長樂信都人頗涉經籍允修撰國記選為校書郎與其緝著常令模帶持管籥每日同入史閣接膝對筵屬述時事允年已九十手目稍衰多遣模執筆而占授裁斷之如此者五六歲允所成篇卷模預有功太和中除南潁川太守王肅之歸闕路經懸瓠羈旅窮悴時人莫識模獨經給所須弔待以禮肅深感其意及肅臨豫州模猶在郡徵報復之由是

為新蔡太守在二郡積十年寬猛相濟頗有聲稱遷陳
留太守時年七十餘矣而飾老隱年昧禁自効遂家於
南潁川不復歸其舊鄉矣允從祖弟祐字子集小字次
奴本名禧以與咸陽王同名孝文賜名焉祖展慕容寶
黃門郎道武平中山徙京師卒於三都大官父謹從太
武滅赫連昌以功賜爵南皮子與崔浩共參著作位中
書侍郎給事中冀青二州中正假散騎常侍脩縣侯使
高麗卒贈冀州刺史假滄水公諡曰康祐兄祚襲爵位

東青州刺史祐博涉書史好文字雜說性通放不拘小節自中書學生再遷中書侍郎賜爵建康子文成末兗州東郡吏獲一異獸送之京師時人咸無識者詔以問祐祐曰此是三吳所出厥名鮫鯉餘域率無今我獲之吳楚之地其有歸國乎又有人於靈丘得玉印一以獻詔以示祐祐曰印上有籀書二字文曰宋壽壽者命也我獲其命亦是歸我之徵獻文初宋義陽王昶來奔薛安都等以五州降附時謂祐言有驗孝文初拜祕書令

後與丞李彪等奏曰尚書者記言之體春秋者錄事之辭尋覽前志斯皆司勲之實錄也惟聖朝創制上古開基長發自始祖以後至於文成其間世數久遠是以史弗能傳臣等疎漏忝當史職披覽國記竊有志焉愚謂自王業始基庶事草創皇始以降光宅中土宜依遷國大體令事類相從紀傳區別表志殊貫如此修綴事可備書自著作郎以下請取有才用者參造國書如得其人三年有成帝從之孝文嘗問祐比水旱不調五穀不

熟何以止災而致豐稔祐對曰昔堯湯之運不能去陽
九之會陛下道同前聖其如水旱何但當旌賢佐政敬
授民時則災消穰至矣又問止盜之方祐曰昔宋均樹
德害獸不過其鄉卓茂善教蝗蟲不入其境彼盜賊者
人也苟訓之有方寧不易息當須宰守循良則盜賊止
矣祐又上疏云今之選舉不採職治之優劣專簡年勞
之多少其非盡才之謂宜停此薄藝棄彼朽勞唯才是
舉則官方斯穆又勲舊之臣年勤可錄而才非撫人者

則可加以爵賞不宜委以方任所謂王者可私人以財
不私人以官者也帝皆善之加給事中冀州大中正時
李彪專統著作祐為令時關豫而已出為輔國將軍西
兗州刺史假東光侯鎮滑臺祐以郡國雖有太學縣黨
宜有黌序乃縣立講學黨立教學村立小學又令一家
之中自立一碓五家之外共造一井以給行客不聽婦
人寄舂取水又設禁賊之方令五五相保若盜發則連
其坐初似煩碎後風化大行寇盜止息轉宋王劉昶傳

以參定律令賜帛粟馬等昶以其舊官年耆雅相祗重
拜光祿大夫傳如故昶薨徵為宗正卿而祐留連彭城
久不赴僕射李冲奏祐無事稽命處刑二歲以贖論免
卿任復為光祿卒贈太常諡曰煬侯詔曰不遵上命曰
靈可諡為靈子和璧字僧壽有學尚位中書博士早卒
和璧子顥字明賢學涉有時譽襲爵建康子位輔國將
軍朝散大夫贈滄州刺史諡曰惠子德正仕齊列在齊
史顥弟雅字興賢有風度位定州撫軍府長史天平中

追贈冀州刺史子德範早有令聞位任城太守雅弟諒
字修賢少好學多識彊記居喪以孝聞太和末京兆王
愉開府辟召孝文妙簡僚佐諒與隴西李仲尚趙郡李
鳳起等同時應選正光中加驍騎將軍為徐州行臺至
彭城屬元法僧反逼諒同之不從見害贈滄州刺史又
詔以諒臨危授命復贈使持節平北將軍幽州刺史優
授一子出身諡曰忠侯諒造親表譜錄四十餘卷自五
世以下內外曲盡覽者服其博記祐從父弟翼字次同

豪俠有風神孝昌末葛榮作亂朝廷以翼山東豪右即家拜勃海太守翼率合境徙居河濟間朝議因置東冀州以翼為刺史封樂城縣侯俄除定州刺史以賊亂不行及爾朱兆弑孝莊翼保境自守卒中興初贈使持節侍中太保錄尚書六州諸軍事冀州刺史諡曰文宣子乾慎昂季式皆齊氏元功並列在齊史

崔鑒字神具博陵安平人也六世祖贊魏尚書僕射五世祖洪晉吏部尚書曾祖懿字世茂仕燕位祕書監祖

遭字景遇位鉅鹿令父綽少孤學行修明有名於世與
范陽盧元勃海高允趙郡李靈等俱被徵尋以母老固
辭後為郡功曹卒鑒頗有文學自中書博士轉侍郎賜
爵桐廬縣子出為東徐州刺史鑒欲安新附人有年老
者表求假以守令詔從之又於州內治銅為農具兵人
獲利卒贈青州刺史安平侯諡曰康子合字貴和少有
時譽襲爵桐廬子位終常山太守合弟康少有志氣陽
平王順之為定州康為衛軍府錄事帶母極令時甄琛

為長史曾因公事言競之間以拳擊琛墜牀琛以本縣
長笑而不論其豪率若此彭城王勰行壽春康從行招
致游俠以為部下勰目之謂左右曰吾嘗寄膽氣於此
人累遷廣平內史大納財貨為清論所鄙後為燕州刺
史為杜洛周攻圍堅守歷年朝廷遣都督元譚赴救譚
敗康奔定州坐免官太昌中除驃騎大將軍儀同三司
頻以老病求解永熙三年去職薨贈尚書令司徒公諡
曰靖穆長子忻字伯悅有世幹以鄭儼之甥累遷兼尚

書左丞孝莊初遇害河陰追贈殿中尚書冀州刺史忻
弟仲哲早喪所生母為祖母宋氏所養六歲宋亡啼慕
不止見者悲之性恢達常以將畧自許以軍功賜爵安
平縣男及父康於燕被圍泣訴朝廷遂除別將與都督
元譚赴援戰沒子長瑜位至開府中兵參軍長瑜子子
樞列在齊史仲哲弟叔彥位撫軍將軍叔彥弟季通位
司農少卿季通子德立好學愛屬文預撰御覽位濟州
別駕季通弟季良風望閑雅位太學博士以征討功賜

爵蒲陰縣子累遷太尉長史及康東還鄉季良亦去職
歸養後位中軍將軍光祿大夫先康卒於家贈尚書右
僕射諡曰簡康弟習字貴禮有世用卒於河東太守贈
并州刺史鑒兄標字洛祖行博陵太守標子文業中書
郎鉅鹿太守文業子伯謙仕齊歷濟北南鉅鹿太守有
善政列在良吏傳中

崔辯字神通覽之從祖弟也祖琨字景龍行本郡太守
父經贈兗州刺史辯學涉經史風儀整峻獻文徵拜中

書博士武邑太守政事之餘專以勸學卒贈安南將軍

定州刺史諡曰恭長子景雋鯁正有高風好古博涉以

經明行修徵拜中書博士歷侍御史主文中散孝文賜

名為逸後為員外散騎侍郎與著作郎韓興宗參定朝

儀雅為孝文所知重遷國子博士每有公事逸常被詔

獨進博士特命自逸始轉通直散騎常侍廷尉少卿卒

子巨倫字孝宗幼孤及長歷涉經史有文學武藝叔楷

為殷州巨倫乃為長史北道別將在州陷賊斂恤存亡

為賊所義葛榮聞其名欲用為黃門郎巨倫心惡之至
五月五日會集官寮令巨倫贈詩巨倫乃曰五月五日
時天氣已大熱狗便呀欲死牛復喘吐舌以此自晦獲
免結死士夜中南走逢賊俱恐不濟巨倫曰寧南死一
寸豈北死一尺便欺賊曰吾受勅而行賊執火觀勅火
未然巨倫手刃賊十餘人賊乃四潰得馬數匹夜陰失
道唯看佛塔戶而行到洛陽持節別將北討初楷喪之
始巨倫收殯倉卒事不周固至是遂偷路改殯并竊家

口以歸尋授國子博士孝莊即位除東濮陽太守時河北紛梗人避賊多入郡界歲儉饑之巨倫傾資贍恤務相全濟時類高之元顥入洛據郡不從孝莊還宮封漁陽縣男後除光祿大夫卒子武襲初巨倫有姊明慧有才行因患眇一目內外親族莫有求者其家議欲下嫁之巨倫姑趙國李叔允之妻聞而悲感曰吾兄盛德不幸早世豈令此女屈事卑族乃為子翼納之時人歎其義識逸弟模字叔軌身長八尺圍亦如之出後其叔雅

有志度蕭寶夤討關隴引為西征別將屢有戰功封槐

里縣伯後行岐州事擊賊歿於陣永熙中贈驃騎大將

軍儀同三司都督相州刺史模弟楷字季則為廣平王

懷文學正始中以王國官非其人多被戮唯楷與楊昱

數諫諍獲免後為太子中舍人左中郎將以黨附高肇

為中尉所劾事在高聰傳楷性嚴烈能摧挫豪彊時人

語曰莫獾

郁買反

獬

孤楷反

付崔楷時冀定數州頻遭水害

楷上疏導之便宜事遂施行孝昌初置殷州以楷為刺

史加後將軍楷將之州人皆勸單身述職楷曰單身赴
任朝廷謂吾有進退之計將士又誰肯固志遂闔門赴
州賊勢已逼或勸減少弱以避之乃遣第四女第三男
夜出既而曰一朝送免兒女人將謂吾心不固遂命追
還及賊來攻楷率力拒抗莫不爭奮咸稱崔公尚不惜
百口吾等何愛一身力竭城陷楷執節不屈賊遂害之
楷兄弟父子並死王事朝野傷歎焉贈侍中鎮軍將軍
定州刺史永熙中又特贈驃騎大將軍儀同三司都督

冀州刺史長子士元沈雅有學問州陷戰沒贈平州刺史子育王少以器幹稱仕齊至起部郎子文豹字蔚少有文才本州大中正士元弟士謙仕周為荊州刺史列在周史

崔挺字雙根辯之從父弟也父鬱濮陽太守挺幼孤居喪盡禮少敦學業多所覽究五世同居門有禮義於後頻年饑家始分析挺與弟振推讓田宅舊資唯守墓田而已家徒壁立兄弟怡然手不釋卷鄉人有贍遺挺辭

而後受仍亦散之舉秀才射策高第拜中書博士轉侍郎以工書授勅於長安書文明太后父燕宣王碑賜爵秦昌子轉登聞令遷典屬國下大夫以參議律令賜帛穀馬牛等尚書李冲甚重之孝文以挺女為嬪宋王劉昶南鎮彭城詔挺為長史以疾辭免乃以王肅為長史其被遇如此復拜昭武將軍光州刺史威恩並著風化大行及車駕幸兗州召挺赴行在所問以治邊之畧因及文章帝甚悅之謂挺曰別卿以來倏焉二載吾所綴

文已成一集今當給卿副本時可觀之又顧謂侍臣曰
擁旄者悉皆如此吾何憂哉復還州及散騎常侍張彝
巡行風俗謂曰彝受使巡方採察謠誦入境觀政實媿
清使之名州舊掖城西北數里有斧山峯嶺高峻北臨
滄海南望岱岳為一邦遊觀之地挺於頂上欲營觀宇
故老曰此嶺上秋夏之際常有暴雨迅風巖石盡落相
傳云是龍道恐此觀不可久立挺曰人龍相去何遠之
有虬龍倏忽豈唯一路乎遂營之數年間果無風雨之

異挺既代即為風雨所毀於後作終不就衆以為善化
所感時以犯罪配邊者多有逃越遂立重制一人犯罪
逋亡闔門充役挺上書以周書父子罪不相及以一人
犯罪延及闔門豈不哀哉辭甚雅切帝納之先是州內
少鐵器用皆求之他境挺表復鐵官公私有賴孝文將
辨天下氏族仍亦訪定乃遙授挺本州大中正掖縣有
人年踰九十扶輿造州自稱少曾充使林邑得一美玉
方尺四寸甚有光采藏之海島垂六十載忻逢明政今

願奉之挺曰吾雖德謝古人未能以玉為寶遣船隨取
光潤果然迄不肯受乃表送都景明初見代老幼泣涕
追隨縑帛送贈悉不納散騎常侍趙修得幸宣武挺雖
同州壤未嘗詣門北海王詳為司徒錄尚書事以挺為
司馬挺固辭不免世人皆歎其屈挺處之夷然後詳攝
選衆人競稱考第以求遷叙挺獨無言詳曰崔光州考
汲並未加授宜投一牒當為申請遂伯玉恥獨為君子
亦何故默然挺曰階級是聖朝大例考課亦國之常典

至於自銜求進竊以為羞詳大相稱嘆自其為司馬詳

未曾呼名常稱州號以示優禮景明四年卒時年五十

九贈輔國將軍幽州刺史諡曰景光州故吏聞凶問至

莫不悲感共鑄八尺銅像於城東廣固寺起入闕齋追

奉冥福其遺愛如此初崔光之在貧賤也挺贍遺衣服

常親敬焉又識邢巒宋弁於童稚終並遠致世稱其知

人歷官二十餘年家資不益食不重味室無綺羅閨門

之內雍雍如也欲諸子庶讓恭敬因皆以孝為名及葬

親故多有贈賄諸子推挺素志一無所受有子六人長子孝芬字恭梓早有才識博學好文章孝文召見甚嗟賞之李彪謂挺曰比見賢子謁帝旨喻殊優今當為絕羣耳挺曰卿自欲善處人父子之間然斯言吾不敢聞也後襲父爵累遷司空屬定州大中正長於剖判甚有能名府主任城王澄雅重之澄奏地制八條孝芬所參定也遷廷尉少卿孝昌初梁將裴邃等寇淮南詔行臺鄺道元都督河間王榮討之勅孝芬持節催令赴援賊

退而還遷荊州刺史兼尚書南道行臺領軍司率諸將
以援神雋因代焉孝芬遂從恒農道南入敵便奔散人
還安堵明帝嘉勞之後以元乂之黨與盧同李獎等並
除名徵還又除孝芬為廷尉章武王融以贓貨被劾孝
芬案以重法及融為都督北討鮮于修禮時孝芬弟孝
演率宗從在博陵為賊攻陷遇害融密啟云孝演入賊
為逆遂見收捕全家投梁遇赦乃還後梁將成景雋逼
彭城孝芬兼尚書右丞為徐州行臺孝芬將發入辭靈

太后謂曰卿女今事我兒與卿是親曾何相負而內頭
元义車內稱此嫗須了却孝芬曰臣蒙國厚恩義無斯
語假有斯語誰能得聞若有此聞即此人於元义親密
過臣遠矣乞對之足辨虛實太后乃有媿色孝芬既至
景儁等力屈退走以孝芬兼尚書為徐兗二州行臺建
義初太山太守羊侃據郡反引南賊圍兗州行臺除孝
芬散騎常侍鎮東將軍金紫光祿大夫仍兼尚書東道
行臺與大都督刁宣往救援與行臺于侃時相接至便

圍之侃突圍奔梁永安中授西兗州刺史孝芬倦於外役固辭不行仍為太常卿太昌初兼殿中尚書後加儀同三司兼吏部尚書孝武帝入關齊神武至洛與尚書辛雄劉廐等並被誅沒其家口天平中乃免之孝芬博聞口辯善談論愛好後進終日忻然商榷古今間以嘲諛聽者忘疲文筆數十篇有子八人長子勉字宣祖頗涉史傳普泰中兼尚書右丞勉善附會世論以浮競譏之為尚書令爾朱世隆所親待而尚書魏季景尤為世

隆所知勉與季景內頗不睦季景於世隆求右丞奪勉
所兼世隆啟用季景勉遂悵快自失太昌初除散騎常
侍征東將軍金紫光祿大夫定州大中正勅左右廂出
入爾朱氏敗被收逃免後見齊神武神武勞撫之天平
初遣勉送勲貴妻子赴定州因得還屬母李氏喪勉哀
號過性過病卒無子弟宣度以子龍子為後勉弟猷周
少司徒列在周史孝芬弟孝偉趙郡太守郡經葛榮離
亂人皆賣鬻兒女夏堪大熟孝偉勸戶人多收之郡內

乃安教其人種植招撫遺散先恩後威一周之後流戶
大至興立學校親加勸勵百姓賴之卒贈瀛州刺史諡
曰簡朝議謂為未申復贈安北將軍定州刺史子昂齊
祠部尚書齊史有傳孝偉弟孝演字則伯出繼伯父性
通率美鬚髯姿貌瓌傑少無宦情沈靜鄉里位瀛州安
西府外兵參軍因罷歸及鮮于修禮起逆遇害無子弟
孝直以子士游為後孝直字叔廣身長八尺眉目疎朗
早有志尚稍遷直閣將軍通直散騎常侍爾朱兆入洛

孝直以天下未寧去職歸里太昌中除衛將軍右光祿
大夫辭不赴卒於家誠諸子曰吾才疎効薄於國無功
若朝廷復加贈諡宜循吾意不得祇受若致干求則非
吾意子士順位太府卿孝直弟孝政字季讓十歲挺亡
號哭不絕見者為之悲慘志尚貞立博學經史雅好詞
賦喪紀特所留情衣服制度手能執造位太尉汝南王
悅行參軍孝芬兄弟孝義慈厚弟孝演孝政先亡孝芬
等號哭哀慟絕肉蔬食容貌毀瘠孝偉等奉孝芬盡恭

順之禮坐食進退孝芬不命則不敢也雞鳴而起且溫
顏色一錢尺帛不入私房吉凶有須聚對分給諸婦亦
相親愛有無共之始挺兄弟同居孝芬叔振既亡後孝
芬等承奉叔母李氏若事所生旦夕溫清出入啟覲家
事巨細一以諮決每兄弟出行有獲財物尺寸以上皆
入李之庫四時分賚李氏自裁之如此二十餘歲撫從
弟宣伯子朗如同氣焉挺弟振字延根少有學行居家
孝為宗族所稱為祕書中散在內謹勅為孝文所知孝

文南討自高陽內史徵為尚書左丞留京振既才幹被擢當世以為榮遷太子庶子景明初除長兼廷尉少卿振有公斷以明察稱河內太守陸琇與咸陽王禧同謀為逆禧敗事發振窮案之時琇內外親黨及當朝貴要咸為言之振研覈切至終無縱緩遂斃之於獄其奉法如此除肆州刺史在任有政績卒於河東太守贈南充州刺史諡曰定振歷官四十餘載考績恒為稱職議者善之子子朗美容貌涉獵經史少溫厚有風尚位侍御

史加平東將軍卒挺從父子瑜字仲璉少孤有學業位鴻臚少卿封高邑男贈瀛州刺史子孟舒字長才襲父爵位廣平太守卒贈殷州刺史鎮東將軍諡曰康孟舒弟仲舒位鄴令仲舒弟季舒最知名齊史有傳挺從祖弟敬邕性長者為左中郎將以軍功賜爵臨淄男位營州刺史庫莫奚國有馬數百匹因風入境敬邕悉令送還於是夷人感附卒於太中大夫贈濟州刺史諡曰恭敬邕從弟接字願賓容貌魁偉放邁自高不事拘檢為

中書博士樂陵內史雅為任城王澄所禮待及澄為本部接了無人王敬王忻然容下之後為樂陵太守還鄉卒挺族子纂字叔則博學有文才既不為時知乃著無談子論尋為廷尉正每有大獄多有據明有當官之譽時太原王靜自廷尉監遷少卿纂耻居其下乃與靜書辭氣抑揚無上下禮入啟求解位後為洛陽令卒贈司徒左長史纂兄穆字子和雅有度量州辟主簿卒穆子暹仕齊位尚書右僕射列在齊史暹從祖弟游字延叔

少有風槩為東郡太守郡有鹽戶常供州郡為兵子孫見丁並從役游矜其勞苦乃為表聞請聽更代郡內感之郡學舊在城內游移置城南閑敞處親自說經當時學者無不勸勉號為良守正光中除南秦州刺史先是州人楊松柏洛德兄弟數為反叛游深加招慰兄弟俱至郡謝松柏既郡之豪帥感恩獎喻郡賊咸來歸款且以過在前政不復自疑游乃因宴會一時俱斬於是外人以其不信合境皆反正光五年秦州城人殺刺史李

彥為逆數日後游知必不安謀欲出外尋為城人韓祖香等所攻游事窘登樓慷慨悲歎乃推下小女而殺之義不為羣小所辱遂為祖香等害永安中贈散騎常侍鎮北將軍定州刺史子伏護

李靈字武符趙郡平棘人也父勰字小同恬靜好學有聲趙魏間道武平中原聞其已亡哀惜之贈宣威將軍蘭陵太守神麴中太武徵天下才雋靈至拜中書博士再遷淮陽太守以學優選授文成皇帝經加中散內博

士賜爵高邑子文成踐阼卒於洛州刺史贈定州刺史
鉅鹿公諡曰簡子恢襲以師傅子拜長安鎮副將進爵
為侯假鉅鹿公後東平王道符謀反遇害贈定州刺史
鉅鹿公諡曰貞恢弟綜行河間郡早卒綜孫渾列在齊
史恢長子悅祖襲爵高邑侯例降為伯卒悅祖子瑾字
伯瓊襲位大司農卿瑾淳謹好學老而不倦卒贈司空
悅祖弟顯甫顯甫子元忠元忠齊史有傳

李琛字世顯靈弟趙郡太守均之子也身長八尺五寸

容貌魁偉受學於梁祚位中書郎雅為高允所知初宋
徐州刺史薛安都舉彭城降詔鎮南大將軍博陵公尉
元鎮東將軍城陽公孔伯恭等迎之獻文復以琛參二
府軍事安都率文武出迎元不加禮接安都還城遂不
降宋將張永沈攸之等先屯下碭元令琛與中書郎高
閭入彭城說安都即與俱載赴軍元等入城收管籥其
夜永攻南門不克退還琛勸元乘張永失據攻永米船
大破之於是遂定淮北加琛寧朔將軍與張譙對為充

州刺史安帖初附以參定徐州功賜爵始封侯卒諡曰懿子元茂襲爵元茂以寬雅著稱位司徒司馬彭城鎮副將民吏安之卒贈顯武將軍徐州刺史諡曰順子秀之字鳳起襲爵位尚書都官郎秀之弟子雲字鳳昇子雲弟子羽字鳳降子羽弟子岳字鳳時秀之等並早孤事母孝謹兄弟容貌並魁偉風度審正而皆早卒鳳昇子道宗位直閣將軍道宗弟德林司徒中兵參軍元茂弟宣茂太和初拜中書博士後兼定州大中正受鄉人

財貨為御史所劾除名正始初除太中大夫遷光祿勳
與游肇往復肇善之卒於幽州刺史遺令薄葬贈齊州
刺史諡曰惠子籍之字修遠性謹正麤涉書史位司徒
諮議參軍太中大夫著忠誥一篇文多不載卒贈定州
刺史子徹仕齊位尚書左丞徹子純隋開皇中為介州
長史純子德饒有至性列在孝友傳中徹弟公緒齊初
以侍御史徵不就齊史有傳

李順字德正靈之從父弟也父系慕容垂散騎侍郎東

武城令治有能名道武定中原以為平棘令卒贈趙郡
太守平棘男順博涉經史有計策知名於世神瑞中拜
中書博士轉中書侍郎始光初從征蠕蠕以籌畧之功
拜後軍將軍仍賜爵平棘子加奮威將軍太武將討赫
連昌謂崔浩曰朕前北征李順獻策數事實合經畧太
謀今欲使總攝前驅之事卿以為何如浩對曰順智足
周務實如聖旨但臣與之婚姻深知其行然性果於去
就不可專委帝乃止初浩弟娶順妹又以弟子娶順女

雖二門婚媾而頗輕順順又不伏由是潛相猜忌故浩
毀之至統萬大破昌軍順謀功居多右轉拜左軍將軍
後征統萬遷前將軍授之以兵昌出逆戰順督勒士衆
破其左軍及克統萬帝賜諸將珍寶雜物順固辭唯取
書數千卷帝善之遷給事黃門侍郎賜奴婢十五戶帛
千疋又從擊赫連定於平涼三秦平進爵為侯遷四部
尚書甚見寵待沮渠蒙遜以河西內附帝欲簡行人崔
浩曰宜今清德重臣奉詔褒慰尚書順即其人也帝曰

順納言大臣固不宜方為此使若蒙遜身執玉帛而朝
於朕復何以加之浩曰邢貞使吳亦魏之太常苟事是
宜無嫌於重帝從之以順為太常策拜蒙遜為太傅涼
王使還拜使持節都督秦雍梁益四州諸軍事寧西將
軍長安鎮都大將軍開府進爵高平公未幾復徵為四
部尚書加散騎常侍延和初復使涼州蒙遜辭以疾翌
日延順入至庭中而蒙遜箕坐隱几無起動之狀順正
色大言曰不謂此叟無禮乃至於是握節而出蒙遜遽

使中兵校郎楊定歸追順於庭曰太常既雅恕衰疾又傳云朝廷有不拜之詔是以敢自安耳若太常曰爾拜爾跪而不祇命斯乃小臣之罪矣順益怒曰齊桓公九合諸侯一匡天下周王賜胙命曰伯舅無下拜而桓公奉遵臣節降而拜受今君雖功高勲厚未若齊桓之勤朝廷雖相崇重未有不拜之詔而便偃蹇自取此乃速禍之道蒙遜遂拜伏盡禮禮畢蒙遜曰夫恃德者昌恃力者亡朝廷頃來征伐屢克恐不可常勝順曰天兵四

臨昭德罰罪何云恃力夫聖王之用兵也征南蠻則北狄怨討西戎則東夷恨天子安得已哉順既使還帝問與蒙遜往復之辭及蒙遜政教得失順曰蒙遜專威河右三十許年經涉艱難麤識機變又綏集荒陬遠人頗亦畏服雖不能貽厥孫謀猶足以終其一世但前歲表許十月送西域沙門曇無讖及臣往迎便乖本意不忠不信於是而甚禮者身之與恭者行之本末有無禮不恭而能久享福祿以臣觀之不復周歲矣帝曰若如卿

言効在無遠襲世之後早晚當滅順對曰臣畧見其子
並非才俊如聞敦煌太守牧捷器性麤立若繼蒙遜者
必此人也然比之於父僉云不逮殆天所用資聖明也
帝曰朕今方事于東未暇營西如卿所言三五年間不
足為晚且停前計以為後圖既而蒙遜死問至帝謂順
曰卿言蒙遜死今則驗矣又言牧捷立何其妙哉朕克
涼州亦當不遠於是賜絹千疋廐馬一乘進號安西將
軍寵侍彌厚政之巨細無所不參崔浩惡之順凡使涼

州十有二返太武稱其能而蒙遜數與順遊宴頗有悖慢之言恐順東還泄之尋以金寶納順懷中故蒙遜罪釁得不聞徹浩知之密言於帝帝未之信太延三年順復使涼州及還帝問以將平河右之計順對以民勞既久不可頻動帝從之五年議征涼州順以涼州乏水草不宜遠征浩固以為宜征帝從浩議及至姑臧甚豐水草帝與景穆書以言其事頗銜順後謂浩曰卿昔所言今果驗矣浩曰臣之所言虛實皆如此類初曇無讖微

有方術帝詔順令蒙遜送之京邑順受蒙遜金聽其殺

之帝克涼州後聞而嫌順然猶以寵舊未加其罪涼土

既平詔順差次羣臣賜以爵位順頗受納品第不平涼

州人徐桀發其事浩又毀之帝大怒太平真君三年遂

刑順於城西順死後數年其從父弟孝伯為太武所知

重居中用事及浩之誅帝怒甚謂孝伯曰卿從兄往雖

誤國朕意亦未至此由浩遂殺卿從兄皇興初順子敷

等貴顯追贈順侍中鎮西大將軍太尉高平王諡曰宣

王妻邢氏曰孝妃順四子長子數字景文太平真君二年選入中書教學以忠謹給侍東宮又為中散與李訢盧遐度世等並以聰敏內參機密敷性謙恭加有文學文成寵遇之遷祕書下大夫賜爵平棘子後兼錄南部遷散騎常侍南部尚書中書監領內外祕書襲爵高平公朝政大議事無不關及宋徐州刺史薛安都司州刺史常珍奇等以彭城懸瓠降于時朝議謂未必可信敷乃固執必然及遣師接援淮海寧輯敷既見待二世兄

弟親戚在朝者十餘人弟奕又有寵於文明太后李訢
列其隱罪二十餘條獻文大怒皇興四年誅數兄弟削
順位號為庶人數從弟顯德妹夫廣平宋叔珍等皆坐
關亂公私同時伏法數兄弟敦崇孝義家門有禮至於
居喪法度吉凶書記皆合典則為北州所稱美既致斯
禍時人歎惜之數弟式字景則以學業知名位西兗州
刺史濮陽侯式自以家據權要心慮危禍常勅津吏臺
有使者必先啟然後度之既而使人卒至始云南過既

濟突入執式赴都與兄俱死子憲字仲軌清粹善風儀
好學有器度太和初襲爵又降為伯拜祕書中散雅為
孝文知賞後拜趙郡太守趙脩與其州里脩歸葬父母
也牧守以下畏之累跡憲不為屈時人高之後以黨附
高肇為御史所劾正光五年行雍州刺史尋除七兵尚
書孝昌中除征東將軍揚州刺史淮南大都督及梁平
北將軍元樹等來寇憲力屈而降因求還國既至勅付
廷尉憲女壻安樂王鑒據相州反靈太后謂鑒心懷劫

胥遂詔賜憲死永熙中贈儀同三司尚書令定州刺史
諡曰文靜子希遠字景冲早卒希遠子祖俊襲祖爵式
弟奕字景世美容貌有才藝位都官尚書安平侯與兄
數同死太和初文明太后追念奕兄弟及誅李昕存問
憲等一二家歲時賜以布帛奕弟罔字道度少為中散
逃避得免後歷位度支尚書太和二十一年孝文幸長
安罔以咸陽山河嶮固秦漢舊都勸帝去洛陽都之後
孝文引見罔笑謂之曰昔婁敬一說漢祖即日西駕尚

書今以西京說朕使朕不廢東轅當是獻可理殊所以
今古相反耳問曰昔漢祖起於布衣欲藉嶮以自固婁
敬之言符於本旨今陛下德洽四海事同隆周是以愚
臣獻說不能上動帝大悅問性鯁烈敢直言常面折孝
文彈駁公卿無所迴避百寮皆憚之孝文常加優禮每
車駕巡幸恒兼尚書右僕射雖才學不及諸兄然公彊
當世堪濟過之卒子祐字長禧篤穆友于見稱于世歷
位給事中累遷博陵太守所在亦以清幹著稱順弟脩

基陳留太守卒子琛幽高平太守琛幽兄子洪鸞河間
太守希遠弟希宗字景元性寬和儀貌雅麗有才學位
金紫光祿大夫齊神武擢為中外府長史文宣納其第
二女為皇后位上黨太守卒贈司空公殷州刺史諡曰
文簡希宗長子祖昇儀容瓌麗垂手過膝文學足以自
通位齊州刺史淫於從兵妻見殺祖昇弟祖勲位給事
黃門侍郎齊文宣以其女為濟南王妃除侍中封丹陽
郡王尋改封公濟南即位除趙州刺史濟南廢還除金

紫光祿大夫太寧中昭信后有寵於武城除祖勲齊州刺史在州臧賄狼籍坐免官復起為光州刺史祖勲性貪慢兼其妻崔氏驕豪干政時論鄙之女侍中陸媼母元氏即祖勲之妻姨也由是附會又除西兗州刺史殿中尚書祖勲素無才幹自少及長居官皆無可稱述卒贈尚書右僕射武平中將封后兄君璧等為王還復祖勲王爵其弟祖欽封竟陵王位光祿卿祖勲第三弟祖納兄弟中最有識尚以經史被知卒於散騎常侍希宗

弟希仁字景山有學識卒於侍中太子詹事子公統仕

齊位員外郎高歸彥之反公統為其謀主歸彥敗伏法

其母崔氏當沒入官其弟宣寶行賕改籍注老事發武

成命拊殺之肝腦塗地希仁弟騫字希義博涉經史文

藻富瞻位散騎常侍殷州大中正尚書左丞以本官兼

散騎常侍使于梁後坐事免論者以為非罪騫嘗贈親

友盧元明魏收詩云監河愛升水蘇子惜餘明益州達

友趣廷尉辨交情蓋失職之志云後除給事黃門侍郎

卒其文筆別有集錄齊受禪贈開府儀同三司諡曰文惠希義弟希禮字景節性敦厚容止樞機動遵禮度起家著作佐郎修起居注歷位太常少卿兼廷尉少卿行魏尹事豫州刺史仍居議曹與邢邵等議定禮律卒於信州刺史子孝貞列在隋史

李孝伯高平公順從父弟也父曾少治鄭氏禮左氏春秋以教授為業郡三辟功曹並不就曰功曹之職雖曰鄉選高第猶是郡吏耳北面事人亦何容易州辟主簿

到官月餘乃歎曰梁敬叔云州郡之職徒勞人耳道之不行身之憂也遂還家講授道武時徵拜博士出為趙郡太守令行禁止并州丁零數為山東害知曾能得百姓死力憚不入境賊於恒山界得一死鹿謂趙郡地也賊長責之令還送鹿故處鄰郡為之謠曰詐作趙郡鹿猶勝恒山粟其見憚如此卒贈荊州刺史栢人子諡曰懿孝伯少傳父業博綜羣言美風儀動有法則從兄順言於太武徵為中散帝見而異之謂順曰真卿家千里

駒也遷祕書奏事中散轉散騎侍郎光祿大夫賜爵魏
昌子委以軍國機密甚見親寵謀謨切祕時人莫能知
也遷北部尚書以頻從征伐規畧功進爵壽光侯太平
真君末車駕南伐宋安北將軍徐州刺史武陵王駿遣
將馮文恭至蕭城前軍破之宋文希又遣其弟太尉江
夏王義恭率衆赴彭城太武登亞父冢以望城內遣送
其俘蒯應至小市門宣詔勞問義恭等義恭等問應士
馬數應曰中軍四十萬駿遣人獻酒二器甘蔗百挺并

請駱駝明日太武遣孝伯至小市門駿亦使其長史張暢出對孝伯曰主上有詔詔太尉安北可暫出門欲與相見今遣賜駱駝及貂裘雜物暢曰有詔之言何得稱之於此孝伯曰卿家太尉安北是人臣不縱為鄰國之君何為不稱詔於鄰國之臣又何至杜門絕橋暢曰二王以魏帝營壘未立此有精甲十萬恐相陵踐故且閉城待彼休息兵士然後共修戰場尅日交戲孝伯曰令行禁止主將常事何用廢橋杜門又復何以十萬誇大

我亦有良馬百萬復可以此相矜邪既開門暢屏人却
仗出受賜孝伯曰詔以貂裘賜太尉駱駝騾馬賜安北
義恭獻皮袴褶一具駿奉酒二器甘蔗百挺帝又遣賜
義恭駿等氍毹及九種鹽并胡豉義恭駿復獻蠟炬錦等
語具宋張暢傳中孝伯風容閑雅應答如流暢及左右
甚相嗟嘆帝大喜進爵宣城公為使持節散騎常侍平
西將軍秦州刺史卒贈征南大將軍定州刺史諡曰文
昭公孝伯體度恢雅明達政事朝野貴賤咸推重之景

穆曾啟太武廣徵俊秀太武曰朕有一孝伯足治天下
何用多為假復求訪此人輩復亦何可得其見貴如此
性方慎忠厚每朝廷事有所不足必手自書表切言陳
諫或不從者至於再三削減藁草家人不見公廷議論
常引綱紀或有言事者孝伯忿其所陳假有是非終不
抑折及見帝言其所長初不隱人姓名以為己善故衣
冠之士服其雅正自崔浩誅後軍國謀謨咸出孝伯太
武寵眷有亞於浩亦以宰輔遇之獻替補闕其迹不見

時人莫得而知卒之日遠近哀傷焉孝伯美名聞於遐
邇李彪使於江南齊武帝謂之曰北有李孝伯於卿遠
近其為遠人所知若此孝伯妻崔躋女高明婦人生一
子元顯崔氏卒後納翟氏不以為妻憎忌元顯後遇劫
元顯見害世云翟氏所為也元顯志氣甚高為時人所
傷惜翟氏二子安民安上並有風度安民襲爵壽光侯
司徒司馬無子爵除安上鉅鹿太守亦早卒安民弟豹
子後追理先封卒不得襲孝伯兄祥字元善學傳家業

鄉黨宗之位中書博士時尚書韓元興率衆出青州以
祥為軍司畧地至陳汝淮北之人詣軍降者七千餘戶
遷之兗豫之南置淮陽郡以撫之拜祥太守流人歸者
萬餘家百姓安業遷河間太守有威惠之稱徵拜中書
侍郎郡人有千餘上書乞留數年朝廷不許卒官追贈
定州刺史平棘子諡曰憲子安世幼聰悟興安二年文
成帝引見侍郎博士之子簡其秀雋者欲以為中書學
生安世年十一帝見其尚小引問之安世陳說父祖甚

有次第即以為生帝每幸國學常獨被引問詔曰汝但
守此至大不慮不富貴矣天安初拜中散以謹慎為帝
所親愛累遷主客令齊武帝使劉纘朝貢安世奉詔勞
之安世美姿貌善舉止纘等自相謂曰不有君子其能
國乎纘呼安世為典客安世曰三代不共禮五帝各異
樂何以亡秦之官稱於上國纘曰世異之號凡有幾也
安世曰周謂掌客秦改典客漢名鴻臚今曰主客君等
不欲影響文武而殷勤於亡秦纘又指方山曰此山去

燕然遠近安世曰亦猶石頭之於番禺耳國家每有江南使至多至出內藏珍物令都下富室好客服者貨之令使任情交易使至金玉肆問價纘曰北方金玉大賤當是山川所出安世曰聖朝不貴金玉所以價同瓦礫今皇上得通神明地不愛寶故無川無金無山無玉所以同於瓦礫纘初將大市得安世言慙而罷遷主客給事中時人民饑困流散豪右多有占奪安世乃上疏陳均量之制孝文深納之後均田之制起於此矣出除安

南將軍相州刺史敦勸農桑禁斷淫祀以西門豹史起
有功於民者為之脩飾廟堂表薦廣平宋翻陽平路恃
慶皆為朝廷善士初廣平人李波宗族彊盛殘掠生民
前刺史薛道標親往討之波率其宗族拒戰大破擄軍
遂為逋逃之數公私咸患百姓為語曰李波小妹字雍
容褰裙逐馬如卷蓬左射右射必疊雙婦人尚如此男
子那可逢安世設方畧誘波及諸子姪三十餘人斬于
鄴市州內肅然病卒官安世妻博陵崔氏生一子瑒崔

氏以妬悍見出又尚滄水公主生二子諡郁瑒字琚羅
涉歷史傳頗有文才氣尚豪爽公彊當世太師高陽王
雍表薦瑒為友時人多絕戶為沙門瑒上言三千之罪
莫大於不孝不孝之大無過於絕祀安得輕縱背禮之
情而肆其向法之意缺當世之禮而求將來之益棄堂
堂之政而從鬼教乎沙門都統僧暹等忿瑒鬼教之言
以瑒為毀謗佛法泣訴靈太后太后責之瑒自理曰鬼
神之名皆是通靈達稱佛非天非地本出於人名之為

鬼愚謂非謗靈太后雖以瑒言為允然不免遲等意猶罰瑒金一兩轉尚書郎隨蕭寶夤西征以瑒為統軍瑒德洽鄉閭招募雄勇其樂從者數百騎瑒傾家賑恤率之西討寶夤見瑒至撫其肩曰子遠來吾事辦矣故其下每有戰功軍中號曰李公騎寶夤啟瑒為左丞仍為別將軍機戎政皆與參決寶夤又啟為中書侍郎還朝除岐州刺史坐辭不赴任免官建議初河陰遇害初贈尚書右僕射殷州刺史後又贈散騎常侍驃騎大將軍

儀同三司冀州刺史瑒倣儻有大志好飲酒篤於親知
每謂弟郁曰士大夫學問稽古博今而罷何用專經為
老博士也與弟謚特相友愛謚在鄉物故瑒慟哭絕氣
久而方蘇不食數日暮年形骸毀悴人倫哀歎之謚高
尚不就徵辟列在隱逸傳郁字永穆好學沈靖博通經
史為廣平王懷友深見禮遇時學士徐遵明教授山東
生徒甚盛懷徵遵明在館令郁問其五經義例十餘條
遵明所答數條而已稍遷國子博士自國學之建諸博

士率不講說其朝夕教授唯郁而已謙虛寬雅甚有儒
者之風再遷通直散騎常侍建議中以兄瑒卒遂撫育
孤姪歸於鄉里永熙初除散騎常侍衛大將軍左光祿
大夫兼都官尚書尋遷給事黃門侍郎三年於顯陽殿
講禮記詔郁執經郁解說不窮羣難鋒起無廢談笑孝
武及諸王凡預聽者莫不嗟善尋病卒贈散騎常侍驃
騎大將軍尚書左僕射儀同三司都督定州刺史

李喬字承伯案趙郡李氏出自趙將武安君牧當楚漢

之際廣武君左車則其先也左車十四世孫恢字仲興
漢桓靈間高尚不仕號有道大夫恢生定字文義仕魏
位漁陽太守有子四人並仕晉平字伯括為樂平太守
機字仲括位國子博士隱字叔括保字季括位並尚書
郎兄弟皆以儒素著知時謂之四括機子楷字雄方位
書侍御史家于平棘南有男子五人輯是朶勁敵輯字
護宗是字仲黃朶字季黃勁字少黃敵字幼黃並以友
悌著美為當世所宗時所謂四黃者也輯位高密郡守

二子慎敦是位鎮南府長史一子義勁位書侍御史四子盛敏隆喜叡位高平太守二子勗充其後慎敦居栢人子孫甚微義南徙故壘世謂之南祖勗兄弟居巷東盛兄弟居巷西世人指其所居因以為目蓋自此也義字敬仲位司空長史生東宮舍人吉字彥同吉生尚書郎聰字小時聰生真字義深事列于後勗字景賢位頓丘太守勗生趙郡太守頤字彥祖頤生勰系曾各有令子事列于前盛位中書郎三子纘襲閣纘字偉業位太

尉祭酒生四子誕休重苞誕字紹元假趙郡太守生四子建追確龜龜字神龜位州主簿生二子鳳林秀林秀林小名榼性溫直太和中自中書博士為頓丘相豪右畏之景明初試守博陵郡抑彊扶弱政以嚴威為名以母憂去職後為司徒司馬定州大中正太中大夫卒贈齊州刺史裔秀林子也出後伯父鳳林孝昌中為定州鎮軍長史帶博陵太守于時逆賊杜洛周侵亂州界裔潛引洛周州遂陷沒洛周蕩無綱紀至于市令驛帥咸

以為王呼曰市王驛王乃封裔定州王洛周尋為葛榮
所滅裔仍事榮爾朱榮禽葛榮遂繫裔及高昂薛修義
李無為等於晉陽從榮至洛榮死乃免天平初以齊神
武大丞相諮議參軍參定策功封固安縣伯為候衛大
將軍陝州刺史及周文攻克州城見害東魏贈尚書令
司徒定州刺史子子旦襲子旦弟子雄仕周歷隋隋史
有傳裔從祖詵字令世誕弟休之子也休字紹則位散
騎常侍詵與族兄靈族弟熙等俱同時被徵高允為徵

士傳皆著其名詵位中書侍郎京兆太守詵從祖弟善
見位趙郡太守善見子顯進位州主簿濮陽太守顯進
子暎字暉道位相州中從事步兵校尉贈殷州刺史暎
子普濟學涉有名性和韻位濟北太守時人語曰入麤
入細李普濟武定中位北海太守暎弟育字仲遠位相
州防城別將以拒葛榮之勲賜爵趙郡公後除金紫光
祿大夫卒贈都官尚書諡曰貞子愔襲與從父兄普濟
並應秀才舉時人謂其所居為秀才村愔位太子舍人

惜族叔肅字彥雖位員外常侍初謫附侍中元暉後以
左道事侍中穆紹常裸身被髮畫腹銜刀於隱屏處為
紹求福故紹愛之薦為黃門郎性酒狂從靈太后幸江
陽王繼第侍飲頗醉言辭不遜抗辱太傅清河王懌為
有司彈劾太后恕之卒於夏州刺史肅從弟暉字景林
有學識位廷尉少卿贈齊州刺史諡曰宣子慎武定中
位東平太守暉從弟仲旋司徒左長史恒農太守先是
官牛二姓阻險為害仲旋示以威惠即竝歸伏累遷右

光祿大夫天平初遷都於鄴以仲旋為營構將進號衛
大將軍出為兗州刺史還除將作大匠所歷並著聲績
卒贈驃騎大將軍儀同三司青州刺史子希良侍御史
煥字仲文小字醜壤中書侍郎盛弟隆之後也隆字太
彞位阜城令隆生幕縣令謀謀生始平太守曷生東
郡太守伯應伯應生煥煥有幹用與酈道元俱為李彪
所知恒州刺史穆泰據代都謀反煥以書侍御史與任
城王澄推究之煥先驅至州宣旨曉喻乃執泰等景明

初齊豫州刺史裴叔業以壽春歸附煥以司空從事中郎為軍司馬與楊大眼奚康生迎接仍行揚州事賜爵容城伯及荆蠻擾動勅煥兼道直散騎常侍慰勞之降者萬餘家除梁州刺史時武興氏楊集起舉兵作逆勅假煥平西將軍都督別將大破集起軍又破秦州賊呂苟兒及斬氏王楊定還朝遇患卒贈幽州刺史諡曰昭子密字希邕少有節操母患積年名醫療之不愈乃精習經方洞閑鍼藥母疾得除由是以醫術知名屬爾朱

兆弑逆與勃海高昂為報復計後從神武封容城縣侯
位襄州刺史

李義深趙郡高邑人也祖真字令才位中書侍郎父紹
字嗣宗殷州別駕義深有當世才用而心冒險峭時人
語曰劒戟森森李義深初以殷州別駕歸齊神武再遷
鴻臚少卿見爾朱兆兵盛叛歸之兆平神武恕其罪遷
齊州刺史好利多所受納轉行梁州刺史為陽夏太守
改業告其在州聚斂被禁止卒於禁所子駒駭仕周歷

隋列在隋史義深弟同軌體貌魁岸腰帶十圍學綜諸
經兼該釋氏又好醫術二十舉秀才再遷著作佐郎典
儀注兼國子博士興和中兼通直散騎常侍使梁梁武
深耽釋學遂集名僧於其愛敬同泰二寺講涅槃大品
經引同軌豫席兼遣其朝士議共觀聽同軌論難久之
道俗咸以為善盧景裕卒齊神武引同軌在館教諸公
子甚嘉禮之每旦入授日暮始歸縑素受業者同軌夜
為解說四時恒爾不以為倦卒時人傷惜之神武亦嗟

悼之贈瀛州刺史諡曰康同軌弟幼舉安德太守以貪汙棄市幼舉弟之良有幹用位金部郎中之良弟稚廉齊史有傳

游雅字伯度小名黃頭廣平任人也太武時與勃海高允等俱知名徵拜中書博士後使宋授散騎侍郎賜爵廣平子稍遷太子少傅領禁兵進爵為侯受詔與中書侍郎胡方回等改定律制出為東雍州刺史假梁郡公在任廉白甚有惠政徵為祕書監委以國史之任竟無

所成雅性剛戇好自矜誕凌獵人物高允重雅文學而雅輕允才允性柔寬不以為恨允將婚于邢氏雅勸允娶其族允不從雅曰人貴河間邢不勝廣平游人自棄伯度我自敬黃頭其貴已賤人皆此類也允著徵士頌殊重雅雅因議論長短忿儒者陳奇遂陷奇至族議者深責之卒贈相州刺史諡曰宣侯雅從祖弟明根字志遠祖鯁慕容熙樂浪太守父幼馮跋假廣平太守明根幼年遭亂為櫟陽王氏奴主使牧羊明根以漿壺倩人

書字路邊畫地學之長安鎮將竇瑾見之呼問知其姓名乃告游雅雅使人贖之教書年十六辭雅歸鄉里於白渠坎為窟室讀書積歲雅推薦之太武擢為中書學生性寡慾綜習經史文成踐阼為都曹主畫帝以其敬慎每嗟美之假員外散騎常侍安樂侯使宋宋孝武稱其長者迎送之禮有加常使獻文時累遷東兗州刺史封新泰侯為政清平孝文時為儀曹長清約恭謹號為稱職歷儀曹尚書加散騎常侍詔以與齊武帝絕使多

年令宜通不羣臣會議尚書陸叡曰先以三吳不靖荆
梁有難故權停之將觀釁而動今彼方既靖宜還通使
明根曰中絕行人是朝廷之事深築醴陽侵彼境上二
三之理直在蕭氏我今遣使於理為長孝文從之後為
大鴻臚卿河南王幹師尚書如故隨例降侯為伯又參
律令屢進謹言明根以年踰七十求致仕前後頻表乃
許之引入陳謝悲泣不自勝帝言別殷勤亦為流涕賜
青紗單衣委貌冠被褥錦袍等物其年以司徒尉元為

三老明根為五更行禮辟雍賜步輓一乘給上卿祿供
食之味大官就第月送以定律令賜布帛等歸本郡又
賜安車兩馬幄帳被褥車駕幸鄴明根朝于行宮詔曰
游五更光素蓬簷歸終衡里可謂朝之舊德國之老成
可賜以穀帛勅太官備送珍羞為造甲第國有大政恒
璽書訪之舊疾發動手詔問疾太醫送藥年八十一卒
於家宣武弔祭贈賻甚厚贈光祿大夫金章紫綬諡靖
侯明根歷官內外五十餘年處身以仁接物以禮時論

貴之孝文初明根與高閭以儒老學業特被禮遇公私
出入每相追隨而閭以才筆時侮明根世號高游馬子
肇襲肇字伯始幼為中書學生博綜經史孝文賜名焉
孝文初為內祕書侍御中散稍遷典命中大夫車駕南
伐肇表諫不納尋遷太子中庶子肇謙素敦讓以文雅
見任以父老求解官扶侍孝文欲令祿養出為本州南
安王楨鎮北府長史帶魏郡太守王薨復為高陽王雍
鎮北府長史太守如故為政清簡加以匡贊歷佐二王

甚有聲績以父憂解任復授黃門侍郎兼侍中為畿內
大使黜陟善惡賞罰分明歷太府廷尉卿兼御史中尉
黃門如故肇儒者動存名教直繩所舉莫非傷風敗俗
持法仁平斷獄務於矜恕尚書令高肇宣武之舅百僚
懾憚以肇名與已同欲令改易肇以孝文所賜執志不
許高肇甚銜之宣武嘉其剛梗盧昶之在朐山也肇諫
曰朐山最爾僻在海濱於我非急於賊為利如聞賊將
屢以宿豫求易朐山持此無用之地復彼舊有之疆兵

役時解其利為大帝將從之尋而昶敗遷侍中梁軍主
徐元明斬其青冀二州刺史張稷首以郁州內附朝議
遣兵赴援肇以為不宜勞師爭海島之地帝不納及大
將軍高肇伐蜀肇又陳願俟後圖又不納明帝即位遷
中書令相州刺史有惠政再遷尚書右僕射肇於吏事
斷決不速主者諮呈反覆至於再三必窮其理然後下
筆雖寵勢干請終無迴撓方正之操時人服之及元義
廢靈太后將害太傅清河王懌乃集公卿會議其事於

時羣官莫不失色順旨肇獨抗言以為不可終不下署
卒諡文貞公肇外寬柔內剛直耽好經傳手不釋書善
周易毛詩尤精三禮為易集解撰冠昏儀曰珪論詩賦
表啟凡七十五篇謙廉不競曾撰儒碁以表其志清貧
寡慾資仰俸祿而已為廷尉時宣武嘗勅肇有所降恕
執而不從曰陛下自能恕之豈可令臣曲筆也其執意
如此及明帝初近侍羣官預在奉迎者自侍中崔光以
下並加封封肇文安縣侯肇獨曰子襲父位古今之常

因此獲封何以自處固辭不應論者高之子祥字宗良
頗有才學襲爵新泰伯位國子博士領尚書郎中明帝
以肇昔辭文安之封復欲封祥祥守其父志卒不受又
追論肇前議清河守正不屈乃封祥高邑縣侯卒贈給
事黃門侍郎幽州刺史諡曰文

高閭字閭女魚陽雍奴人也五世祖原晉安北將軍上
谷太守關中侯有碑在薊中祖雅少有令名位州別駕
父洪字季願位陳留王從事中郎閭貴乃贈幽州刺史

固安貞子閻早孤少好學博綜經史下筆成章少為車
子送租至平城脩刺詣崔浩浩與語奇之使為謝中書
監表明日浩歷租車過駐馬呼閻諸車之皆驚閻本名
驢浩乃改為閻而字馬由是知名和平末為中書侍郎
文成崩乙弗渾擅權內外憂懼文明太后臨朝誅渾引
閻與中書令高允入禁中參決大政賜爵安樂子與鎮
南大將軍尉元南赴徐州以功進爵為侯獻文即位徙
御崇光宮閻表上至德頌高允以閻文章富逸舉以自

代遂為獻文所知參論政事永明初為中書令給事中
委以機密文明太后甚重閭詔令書檄碑銘贊頌皆其
文也太和三年出師討河北閭表諫陳四疑請時速返
旆文明太后曰六軍電發有若摧朽何慮四難也遷尚
書中書監淮南王他奏求依舊斷祿閭表以為若不班
祿則貪者肆其姦情清者不能自保詔從閭議孝文又
引見王公以下於皇信堂令辯忠佞閭曰佞者飾智以
行事忠者發心以附道如玉石皦然可知帝曰玉石同

體而異名忠佞異名而同理求之於同則得其所以異
尋之於異則失其所以同出處同異之間交換忠佞之
境豈是皦然易明哉或有託佞以成忠或有假忠以飾
佞如楚之子綦後事雖忠初非佞也閻曰子綦諫楚初
雖隨述終致忠言此適欲譏諫非為佞也子綦若不設
初權後忠無由得顯帝善閻對後上表曰臣聞為國之
道其要有五一曰文德二曰武功三曰法度四曰防固
五曰刑賞故遠人不服則修文德以來之荒狡放命則

播武功以威之人未知戰則修法度以齊之暴敵輕侵則脩防固以禦之臨事制勝則明刑賞以勸之用能闢國寧方征伐四克北狄悍愚同於禽獸所長者野戰所短者攻城若以狄之所短奪其所長則雖衆不能成患雖來不能內逼又狄散居野澤隨逐水草戰則與室家並至奔則與畜牧俱逃是以古人伐北方攘其侵掠而已歷代為邊患者良以儵忽無常故也六鎮勢分倍衆不鬪互相圍逼難以制之昔周命南仲城彼朔方趙靈

秦始長城是築漢之孝武踵其前事此四代之君皆帝王之雄傑所以同此役者非智術之不長兵衆之不足乃防狄之要事理宜然也今故宜於六鎮之北築長城以禦北虜雖有暫勞之勤乃有永逸之益即於要害往往開門造小城於其側因施却敵多置弓弩狄來有城可守有兵可捍既不攻城野掠無獲草盡則走終始必懲又宜發近州武勇四萬人及京師二萬人合六萬人為武士於苑內立征北大將軍府選忠勇有志幹者以

充其選下置官屬分為三軍二萬人專習弓射二萬人專習刀楯二萬人專習騎稍修立戰場十日一習採諸葛亮八陣之法為平地禦寇之方使其解兵革之宜識旌旗之節兵器精堅必堪禦寇使將有定兵兵有常主上下相信晝夜如一七月發六郡兵萬人各備戎作之具勅臺北諸屯倉庫隨近往來俱送北鎮至八月征北部率所領與六鎮之兵直至磧南揚威漠北狄若來拒與決戰若其不來然後散分其地以築長城計六鎮東

西不過千里若一夫一月之功當三步之地三百人三里三千人三十里三萬人三百里則千里之地彊弱相兼計十萬人必就軍糧一月不足為多人懷永逸勞而無怨計築長城其利有五罷遊防之苦其利一也北部放牧無抄掠之患其利二也登城觀敵以逸待勞其利三也省境防之虞息無時之備其利四也歲常游運永得不匱其利五也孝文詔曰比當與卿面論又詔問為書問蠕蠕時蠕蠕國有喪而書不敘凶事帝曰卿職典

文辭不論彼之凶事若知而不作罪在灼然若情思不
至應謝所任對曰昔蠕蠕主敦崇和親其子屢犯邊境
如臣愚見謂不宜弔帝曰敬其父則子悅敬其君則臣
悅卿云不合弔慰是何言歟問遂免冠謝罪帝曰蠕蠕
使牟提小心恭慎同行疾其敦厚恐其還北必致謗誣
昔劉準使殷靈誕每禁下人不為非禮事及還果被譖
愬以致極刑今書可明年提忠於其國使蠕蠕主知之
是年冬至孝文文明太后大饗羣官孝文親舞於太后

前羣臣皆舞帝乃長歌仍率羣臣皆再拜上壽間進曰

臣聞大夫行孝行合一家諸侯行孝聲著一國天子行
孝德被四海今陛下躬行孝道臣等不勝慶躍謹上千
萬歲壽帝大悅賜羣臣束帛又議政於皇信堂帝曰百
揆多途萬機事猥未周之闕卿等宜有所陳對曰臣伏
思太皇太后十八條之令及仰尋聖朝所行事周於百
揆願終成其事帝曰刑法者王道之所用何者為法何
者為刑施行之日何先何後間對曰臣聞創制立會軌

物齊衆謂之法犯違制約致之於憲謂之刑然則法必先施刑必後著自鞭已下至於死罪皆謂之刑刑者成也一成而不可改帝曰論語稱冉子退朝孔子問曰何晏也對曰有政子曰其事也如其有政雖不吾以吾其與聞之何者為政何者為事問對曰臣聞政者君上所施行經國治民之屬皆謂之政臣下奉教行之謂之事然則天下大同風軌齊一政出於天子王道衰政出於諸侯君道缺政出於大夫帝善之後詔問與太常採雅

樂以營金石又領廣陵王師出除鎮南將軍相州刺史
以參定律令之勤賜粟帛牛馬等遷都洛陽閭表諫言
遷有十損必不得已請遷於鄴帝頗嫌之雍州刺史曹
虎據襄陽請降車駕親幸懸瓠閭表諫洛陽草創虎既
不遣質任必非誠心帝不納虎果虛詐諸將皆無功而
還車駕還幸石濟閭朝於行宮帝謂曰往年之意朕不
欲決征但兵士已集恐為幽王之失不容中止遂至淮
南而彼諸將並列州鎮至無所獲實由晚一月日故耳

閭曰古攻戰法倍則攻之十則圍之聖駕親征誠應大捷所以無大獲良由兵少故也今京邑甫爾庶事造創願陛下當從容伊瀍使德被四海帝曰願從容伊瀍實亦不少但未獲耳閭曰司馬相如臨終恨不封禪今雖江介不賓然中州地畧以盡平豈可聖朝之時而闕盛禮帝曰荆揚未一豈得如卿言也閭以江南非中國且三代之境亦不能遠帝曰淮海惟揚州荆及衡陽惟荊州此非近中國乎及車駕至鄴孝文頻幸其州館下詔

褒揚之問每請本州以自效詔曰問以懸車之年方求衣錦知進忘退有塵謙德可降號平北將軍然朝之老成宜遂情願徙授幽州刺史令懲勸兼行恩法並舉問以諸州罷從事依府置參軍於政體不便表宜復舊帝不悅歲餘表求致仕優答不許徵為太常卿頻表陳遜不聽及車駕南討漢陽問上表諫求迴師帝不納漢陽平賜問璽書問上表陳謝宣武踐阼問累表遜位詔聽之授光祿大夫金印紫綬使吏部尚書邢巒就家拜授

及辭引見於東堂賜以有羞訪之大政以其先朝儒舊
告老求歸帝為之流涕詔曰閻歷官六朝著勲五紀年
禮致辭義光進退歸軒首路感悵兼懷安駟羸金漢世
榮貺可賜安車几杖輿馬繒綵衣服布帛百寮餞之猶
昔羣公之祖二疎也閻進陟北芒上望闕表以示戀慕
之誠景明初卒于家諡文貞閻好為文章軍國書檄詔
令碑頌銘贊百有餘篇集為四十卷其文亦高允之流
後稱二高為當時所服閻彊果敢直諫其在私室言裁

聞耳及於朝廷廣衆之中則談論鋒起人莫能敵孝文
以其文雅之美每優禮之然貪褊矜慢初在中書好罵
辱諸博士學生百有餘人有所干求者無不受其賄及
老為二州乃更廉儉自謹有良牧之譽子元昌襲爵位
遼西博陵二郡太守閭弟悅篤志好學有美於閭早卒
趙逸字思羣天水人也父昌石勒黃門郎逸好學夙成
仕姚興歷中書侍郎後為赫連屈丐所虜拜著作郎太
武平統萬見逸所著曰豎子無道安得為此言乎作者

誰也速推之司徒崔浩進曰彼之謬述亦子雲美新固
宜容之帝乃止歷中書侍郎赤城鎮將頻表乞免久乃
見許性好墳典白首彌勤年踰七十手不釋卷凡所著
述詩賦頌五十餘篇

胡方回安定臨涇人父義周姚泓黃門侍郎方回仕
赫連屈丐為中書侍郎涉獵史籍辭彩可觀為屈丐統
萬城銘虵祠碑諸文頗行於世太武破赫連昌方回入
魏未為時所知後為北鎮司馬為鎮脩表有所稱薦帝

覽其文嗟美問誰所為既知為方回召為中書博士賜
爵臨涇子遷侍郎與太子少傅游雅等改定律制司徒
崔浩及當時朝賢並愛重之清貧守道以壽終

胡叟字倫許安定臨涇人也世為西夏著姓叟少聰慧
年十三辨疑釋理知名鄉國與成人交論甚有屈焉學
不師授披讀羣籍再閱於目皆誦焉好屬文既善為典
雅之詞又工為鄙俗之句以姚氏將衰遂入長安觀風
化隱匿名行懼人見知時京兆韋祖思少閱典墳多蔑

時彥待叟不足叟聊與涼溫拂衣而出祖思固留之曰
當與君論天人之際何遽返乎叟曰論天人者其亡久
矣與君相知何夸言若是遂歸主人賦韋杜二族一宿
而成時年十八矣其述前載無違舊美叙中世有協時
事而末及鄙黷人皆竒其才而畏其筆叟孤飄坎壈未
有仕路遂入漢中宋梁秦二州刺史馮翊吉翰頗相禮
接授叟末佐不稱其懷未幾翰遷益州叟隨入蜀時蜀
沙門法成率僧數千人鑄丈六金像宋文帝惡其聚衆

將加大辟叟聞之即赴丹陽啟申其美遂免復還蜀法
成遺其珍物價直千餘匹叟一無所受後入沮渠牧犍
牧犍遇之不重叟乃為詩示所知廣平程伯達其畧曰
羣大吠新客佞暗排疎賓直途既已塞曲路非所遵望
衛惋祝鮀眄楚悼靈均何用宣憂懷託翰寄輔仁伯達
見詩謂曰涼州雖地居戎域然自張氏以來號有華風
今則憲章無虧何祝鮀之有叟曰貴主奉正朔而弗淳
慕仁義而未允吾之擇木夙在大魏與子暫違非久闊

也歲餘牧捷破降叟既先歸魏朝廷以其識機拜虎威將軍賜爵始復男家於密雲蓬室草筵唯以酒自適謂友人金城宗舒曰我比生活似勝焦先志意所棲謝其高矣文成時召叟及舒並使作檄檄宋蠕蠕舒文劣於叟叟尋歸家不治產業常苦饑貧然不以為恥養子字螟蛉以自給養每至貴勝之門常乘一犢牛弊韋袴褶而已作布囊容三四斛飲噉醉飽便盛餘肉餅以付螟蛉見車馬榮華者視之蔑如也尚書李敷嘗遺以財物

都無所取初叟一見高允曰吳鄭之交以縞紵為美談
吾之於子以韋弦為幽贊以此言之彼可無愧也於允
館中見中書侍郎趙郡李琛琛被服華靡叟貧老衣褐
琛頗忽之叟謂之曰李子今若相脫體上袴褶衣帽君
欲作何許也謂其唯假盛服琛惕然失色叟少孤每言
及其父母則淚下若孺子號春秋當祭之時則先求旨
酒美膳將其所知廣寧常順陽馮翊田文宗上谷侯法
雋提壺執俎至郭外空靜處設坐奠拜盡孝思之敬時

敦煌汜潛家善釀酒每節送一壺與叟著作佐郎博陵
許赤虎河東裴定宗等謂潛曰再三之惠以為過厚子
惠於叟何其恒也潛曰我恒給祭者以其恒於孝思也
論者以潛為君子矣順陽等數子稟叟獎示頗涉文流
高閭曾造其家遇叟袒褐曳柴從田歸舍為閭設濁酒
蔬食皆手自辦然案其館宇卑陋園疇局褊而飯菜精
潔醢醬調美見其二妾並年衰跛眇衣布穿弊閭見其
貧約以衣物直十餘疋贈之亦無辭免閭作宣命賦叟

為之序密雲左右皆祇仰其德歲時遺以麻布穀麥更
隨分散之家無餘財年八十卒無子無家人營主凶事
胡始昌迎殯之于家葬於墓次即令其弟繼之襲其爵
始復男武威將軍更與始昌雖宗室性氣殊詭不相附
其存時往來乃簡及亡而收卹至厚議者以為非必敦
哀疎宗或緣求利品秩也

張湛字子然一字仲元敦煌酒泉人也魏執金吾恭九
葉孫為河西著姓祖質仕涼位金城太守父顯有遠量

李嵩據有西夏引為功曹甚器異之常稱曰吾之臧子
原也位酒泉太守湛弱冠知名涼土好學能屬文冲素
有大志仕沮渠蒙遜位兵部尚書太武平涼州拜寧遠
將軍賜爵南浦男司徒崔浩識而禮之浩注易叙曰國
家西平河右敦煌張湛金城宋興武威段承根三人皆
儒者並有雋才見稱於西州每與余論易余以左氏傳
卦解之遂相勸以為注故為之解其見重如此湛至京
師家貧不立而操尚無虧浩常給其衣食薦為中書侍

郎湛知浩必敗固辭每贈浩詩頌多箴規之言浩亦欽敬其志每常報答極推崇之美浩誅湛懼悉焚之閉門却埽慶弔皆絕以壽終兄銑字懷義閑粹有才幹仕沮渠蒙遜位建昌令性至孝母憂哀毀過人服制雖除而蔬糲弗改崔浩禮之與湛等卒於征西參軍懷義孫通字彥綽博通經史沈冥不預時事頓丘李彪欽其德行與之游款及彪用事言於中書令李沖沖召見甚器重之太和中徵為中書博士中書侍郎永平中又徵為汾

州刺史皆不赴終於家通四子徹麟儉鳳皆傳家業知名於世徹字方明位侍中衛尉卿封西平縣公子敢之襲位太中大夫樂陵郡守麟字嘉應位廣平太守儉字元慎位涼州刺史鳳字孔鸞位國子博士散騎常侍著五經異同評十卷為儒者所稱

段承根武威姑臧人自云漢太尉頽九世孫也父暉字長祚身長八尺餘師事歐陽湯湯甚器愛之有一童子與暉同志後二年童子辭歸從暉請馬暉戲作木馬與

之童子甚悅謝暉曰吾太山府君子奉勅游學今將歸
損子厚贈無以報德子後至常伯封侯非報也且以為
好言終乘馬騰虛而去暉乃自知必將貴仕乞伏熾盤
為輔國大將軍涼州刺史御史大夫西海侯熾盤子慕
末襲位政亂暉父子奔吐谷渾慕容瓚內附暉與承根
歸魏太武至長安人告暉欲南奔云置金於馬韉中帝
密遣視之果如告者言斬之於市暴尸數日時有儒生
京兆林白奴欽暉德音夜竊其尸置之枯井暉女為敦

煌張氏婦聞之乃向長安收葬承根好學機辯有文思而性行疎薄有始無終司徒崔浩見而奇之與同郡陰仲達俱被浩引以為俱涼土文華才堪著述言之太祖竝請為著作郎引與同事世咸重承根文而薄其行甚為敦煌公李寶所敬待浩誅承根與宗欽俱死

宗欽字景若金城人少好學有儒者風仕沮渠蒙遜為中書郎世子洗馬上東宮侍臣箴太武平涼州入魏賜爵卧樹男拜著作郎與高允書贈詩允答書并詩甚相

褒美在河西撰蒙遜記十卷無足可稱

闕駟字元陰敦煌人也祖京父玖並有名於西土玖位會稽令駟博通經傳聰敏過人三史羣言經目則誦時人謂之宿讀注王朗易傳撰十三州志沮渠蒙遜甚重之常侍左右訪以政治損益拜祕書考課郎中給文吏三十人典校經籍刊定諸子二千餘卷牧捷待之彌重拜大行臺遷尚書及姑臧平樂安王丕鎮涼州引為從事中郎王薨後還京師家甚貧弊不免饑寒性能多食

一飯至三升乃飽卒無後

劉昞字延明敦煌人也父寶字子玉以儒學稱昞年十

四就博士郭瑀學瑀時弟子五百餘人通經業者八十

餘人瑀有女始笄妙選良偶有心於昞遂別設一席於

坐前謂諸弟子曰吾有一女向成長欲覓一快女婿誰

坐此席者吾當婚焉昞遂奮衣來坐神志湛然曰昞其

人也瑀遂以女妻之昞後隱居酒泉不應州郡命弟子

受業者五百餘人李嵩徵為儒林祭酒從事中郎嵩好

尚文典書史穿落者親自補治晒時侍側前請代嵩嵩
曰躬自執者欲人重此典籍吾與卿相值何異孔明之
會玄德遷撫夷護軍雖有政務手不釋卷嵩曰卿記注
篇籍以燭繼晝白日且然夜可休息晒曰朝聞道夕死
可矣不知老之將至孔聖稱焉晒何人斯敢不如此晒
以三史文繁著畧記百三十篇八十四卷涼書十卷敦
煌實錄二十卷方言三卷靖恭堂銘一卷注周易韓子
人物志黃石公三畧行於世蒙遜平酒泉拜祕書郎專

管注記築陸沈觀於西苑躬往禮焉號玄處先生學徒數百月致羊酒牧犍尊為國師親自致拜命官屬以下皆北面受業時同郡索敞陰興為助教並以文學見稱每巾衣而入太武平涼州士民東遷夙聞其名拜樂平王從事中郎太武詔諸年七十已上聽留本鄉一子扶養晒時老矣在姑臧歲餘思鄉而返至涼州西四百里韭谷窟卒太和十四年尚書李冲奏晒河右碩儒今子孫沈屈未有祿潤賢者子孫宜蒙顯異於是除其二子

為郢州雲陽令正光三年太保崔光奏復其孫等三家
河西人以為榮

趙柔字元順金城人也少以德行才學知名河右沮渠
牧犍時為金部郎太武平涼州內徙京師歷著作郎河
內太守甚著信惠柔嘗在路得人所遺金珠一貫價直
數百緡柔呼主還之後有人遺柔鐸數百枚者柔與子
善明鬻之市有人從柔買柔索絹二十疋有商人知其
賤與柔三十疋善明欲取之柔曰與人交易一言便定

豈可以利動心遂與之搢紳之流聞而敬服隴西王源
賀采佛經幽旨作祇洹精舍圖偈六卷柔為之注解為
當時俊僧所欽味又憑立銘讚頗行於世子默字冲明
武威太守

索敞字巨振敦煌人也為劉昫助教專心經籍盡能傳
昫業涼州平入魏以儒學為中書博士京師貴遊之子
皆敬憚威嚴多所成益前後顯達位至尚書牧守者數
十人皆受業於敞敞以喪服散於衆篇遂撰比為喪服

要記出補扶風太守在位清貧卒官時舊同學生等為
請諡詔贈涼州刺史諡曰獻初敞在涼州與鄉人陰世
隆文才相友世隆至京師被罪徙和龍屈上谷困不能
前達土人徐能抑掠為奴敞因行至上谷遇見世隆對
泣而別敞為訴理得免世隆子孟貴性至孝每向田芸
耨早朝拜父來亦如之鄉人欽焉

宋繇字體業敦煌人也世仕張氏父僚張玄靚武興太
守繇生而僚為張邕所誅五歲喪母事伯母張氏以孝

聞八歲而張氏卒居喪過禮喟然謂妹夫張彥曰門戶
傾覆負荷在繇不銜膽自勵何以承繼先業遂隨彥至
酒泉追師就學閉室讀書晝夜不倦博通經史諸子羣
言靡不覽綜呂光時舉秀才除郎中後奔段業為中散
騎常侍以業無遠畧西奔李嵩歷位通顯家無餘財雖
兵革間講誦不廢每聞儒士在門常倒屣出迎引談經
籍尤明斷決時事亦無滯也沮渠蒙遜平酒泉於繇室
得書數千卷鹽米數十斛而已蒙遜嘆曰孤不喜克李

氏欣得宋絲耳拜尚書吏部郎中委以銓衡之任蒙遜之將死也以子牧捷委託之牧捷以為左丞送其妹興平公主於京師太武拜絲為河西王右丞相賜爵清水公及平涼州從牧捷至京師卒諡曰恭公長子巖襲爵改為西平侯巖子蔭中書議郎樂安王範從事中郎卒贈咸陽太守蔭子季預性清嚴居家如官位勃海太守子游道仕齊位太府卿性嚴酷列在酷吏傳中

江式字法安陳留濟陽人也六世祖瓊字孟居晉馮翊

太守善蟲篆詁訓永嘉大亂瓊棄官投張軌子孫因居涼土世傳家業祖彊字文威涼州平內徙代京上書三十餘法各有體例又獻經史諸子千餘卷由是拜中書博士卒贈敦煌太守父紹興高允奏為祕書郎掌國史二十餘年以謹厚稱卒於趙郡太守式少專家學數年中常夢兩人時相教授及寤母有記識初拜司徒長史兼行參軍檢校御史尋除符節令以書文昭太后尊號謚冊除奉朝請仍符節令篆體尤工洛京宮殿諸門板

題皆式書也延昌三年三月式表曰臣聞伏羲氏作而
八卦形其畫軒轅氏興而靈龜彰其彩古史倉頡覽二
象之爻觀鳥獸之迹別創文字以代結繩用書契以維
事宜之王迹則百工以敘載之方冊則萬品以明迄於
三代厥體頗異雖依類取制未能殊倉氏矣故周禮八
歲入小學保氏教國子以六書一曰指事二曰象形三
曰諧聲四曰會意五曰轉注六曰假借蓋是史頡之遺
法及宣王太史史籀著大篆十五篇與古文或同或異

時人即謂之籀書孔子脩六經左丘明述春秋皆以古文厥意可得而言其後七國殊軌文字乖別暨秦兼天下丞相李斯乃奏蠲罷不合秦文者斯作倉頡篇率府令趙高作爰歷篇太史令胡毋敬作博學篇皆取史籀式頗有省改所謂小篆者也於是秦燒經書滌除舊典官獄繁多以趨約易始用隸書古文由此息矣隸書者始皇使下杜人程邈附於小篆所作也世人以邈徒隸即謂之隸書故秦有八體一曰大篆二曰小篆三曰符

書四曰蟲書五曰摹印六曰署書七曰殳書八曰隸書
漢興有尉律學傳教以籀書又習八體試之課最以為
尚書史書省字不正輒舉劾焉又有草書莫知誰始其
形書雖無厥誼亦是一時之變通也孝宣時召通倉頡
讀者獨張敞從受之涼州刺史杜業沛人爰禮講學大
夫秦近亦能言之孝平時徵禮等百餘人說文字於未
央宮中以禮為小學元士黃門侍郎楊雄採以作訓纂
篇及亡新居攝自以運應制作使大司馬甄豐校文字

之部頗改定古文時有六書一曰古文孔子壁中書也
二曰奇字即古文而異者三曰篆書云小篆也四曰佐
書秦隸書也五曰繆篆所以摹印也六曰鳥蟲所以幡
信也壁中書者魯恭王壞孔子宅而得尚書春秋論語
孝經也又北平侯張倉獻春秋左氏傳書體與孔氏相
類即前代之古文矣後漢郎中扶風曹喜號曰工篆小
異斯法而甚精巧自是後學皆其法也又詔侍中賈逵
修理舊文殊藝異術王教一端苟有可以加於國者靡

不悉集逵即汝南許慎古學之師也後慎嗟時人之好
奇歎俗儒之穿鑿故撰說文解字十五篇首一終亥各
有部屬可謂類聚羣分雜而不越文質彬彬最可得而
論也左中郎將陳留蔡邕採李斯曹喜之法為古今雜
形詔於太學立石碑刊載五經題書楷法多是邕書也
後開鴻都書畫奇能莫不雲集時諸方獻篆無出邕者
魏初博士清河張揖著埤倉廣雅古今字詁究諸埤廣
綴拾遺漏增長事類抑亦於文為益者然其字詁方之

許篇古今體用或得或失陳留邯鄲淳亦與揖同博開
古藝特善倉雅許氏字指八體六書精究閑理有名於
揖以書教諸皇子又建三字石經於漢碑西其文蔚煥
三體復宣校之說文篆隸大同而古字少異又有京兆
韋誕河東衛覲二家並號能篆當時臺觀榜題寶器之
銘悉是誕書咸傳之子孫世稱其妙晉世義陽王典祠
令任城吕忱表上字林六卷尋其况趣附託許慎說文
而按偶章句隱別古籀奇惑之字文得正隸不差篆意

也忱弟靜別放故左校令李登聲類之法作韻集五卷
使宮商角徵羽各為一篇而文字與兄便是魯衛音讀
楚夏時有不同皇魏承百王之季紹五運之緒世易風
移文字改變篆形謬錯隸體失真俗學鄙習復加虛造
巧談辯士以意為疑炫惑於時難以釐改乃曰追來為
歸巧言為辯小兒為翫神虫為蠶如斯甚衆皆不合孔
氏古書史籀大篆許氏說文石經三字也凡所闕古莫
不惆悵焉嗟夫文字者六籍之宗王教之始前人所以

垂今今人所以識古臣六世祖瓊家世陳留往晉之初
與從父兄俱受學於衛覬古篆之法倉雅方言說文之
誼當時並收善譽而祖遇洛陽之亂避地河西數世傳
習斯業所以不墜也世祖太延中牧犍內附臣亡祖文
成杖策歸國奉獻五世傳掌之書古篆八體之法時蒙
褒錄敘列於儒林官班文省家號世業暨臣闇短識學
庸薄漸漬家風有忝無顯寔籍六世之資奉遵祖考之
訓竊慕古人之軌企踐儒門之轍求撰集古來文字蓋

以許慎說文為主及孔氏尚書五經音注籀篇爾雅三
倉凡將方言通俗文祖文宗埤倉廣雅古今字詁三字
石經字林韻集諸賦文字有六書之誼者以類編聯文
無復重統為一部其古籀奇惑俗隸諸體咸使班於篆
下各有區別詁訓假借之誼僉隨文而解音讀楚夏之
聲並逐字而注其所不知者則闕如也脫蒙遂許冀省
百氏之觀而同文字之域典書祕書所須之書乞垂勅
給并學士五人嘗習文字者助臣披覽書生各五人專

令抄寫侍中黃門國子祭酒一月一監評議疑隱庶事
紕繆所撰名目伏聽明旨詔曰可如所請并就太常冀
兼教八書史也其有所須依請給之明目待書成重聞
式於是撰集字書號曰古今文字凡四十卷大體依許
氏說文為本上篆下隸正光中兼著作郎卒官贈巴州
刺史其書竟未能成式兄子征虜將軍順和亦工篆書
先是太和中兗州人沈法會能隸書宣武之在東宮勅
法會侍書後以隸迹見知於閭里者甚衆然未有如崔

浩之妙

通志卷一百四十八



總校官庶吉士臣侍朝

校對官編修臣章宗瀛

膳錄監生臣任以依